



隆平集第十六卷

宋曾文定公編撰

南豐後學彭期訂

武臣

藥元福太原人有勇善射少爲軍職在後唐爲裨將
晉少帝卽位契丹入寇親征次澶淵登俾望虜衆不
見其際元福與慕容鄴各以二百騎奮擊陣前虜遂
大潰明年虜復內侵張彥澤率師遇之陽城糧道隔
絕仍乏水草諸將皆以虜乘順風宜少俟之元福曰

俟風回吾屬爲虜矣。彼謂我不能逆風戰。今出其不意。兵之詭道也。彥澤從之。殺獲甚衆。追奔二十餘里。以元福爲威州刺史。西戎三族攻靈州。命元福佐朔方節度使馮暉討之。朔方距威州七百里。地無水草。謂之旱海。攜糧至。暉食盡。詰朝行四十里。而虜騎數萬扼要路。暉大懼。遣人致賂求成。雖許及日中。猶未決。暉曰。柰何。元福曰。彼正欲困我耳。察其勢。虜雖衆。特依西山而陣者。其精兵也。請以驍銳先薄西山。彼或少卻。當舉黃旗爲識。合勢擊之。暉善其謀。斬馘殆

盡。漢乾祐中。鳳翔王景崇河中李守正。永興趙思綰。結蜀兵爲援。以叛。元福從暉進討。兵衆寡數倍。他將皆爲卻。而元福擁數百騎獨出。令曰。敢回頭者斬。衆効死以戰。遂有成功。慕容彥超盜據兗海。周祖命曹英爲帥。向訓副之。叅用元福。以兵。謂元福曰。已諭英。訓勿以軍禮見汝。及元福至。英訓皆父事焉。會親征。城遂拔。以功除建雄軍節度使。世宗討劉崇。糧不繼。而班師。命元福殿。崇出追。元福擊走之。在周凡改四鎮。宋興加檢校太師。卒年七十七。贈侍中。

郭瓊字國華幽州盧龍人少事契丹遷至都校後唐明宗朝挈族來歸授以團練使晉末虜陷中原盜賊蠡起德光以瓊爲忻州刺史卽單車赴治盜畏其威相與遁去漢乾祐中淮人攻密州以瓊帥東路行營淮人聞之亦亟引避劉銖守平虜稱疾不朝隱帝疑其叛詔瓊領兵屯青州銖將害之張宴伏兵幕下瓊無懼色銖亦不敢發瓊徐爲言去就禍福銖遂趨召周顯德中爲齊州防禦使歲饑出俸以濟之民多自鄰境至者郡人詣闕以言詔爲立碑宋初以左衛上將軍致仕卒瓊推賢接物有士君子之風所至民懷愛之

何繼筠字化龍河南人父福進仕周至節度使五代史有傳福進節制鎮州繼筠補牙職以偏師出玉門斬并人數千級賞功除刺史契丹入寇又擊敗之宋興命護兵關南乾德六年太祖親征太原繼筠奪并人汾河橋又敗其衆於城下開寶末契丹來爲并援繼筠屯石嶺關追奔數十里斬馘千餘級遂擢授建武軍節度使屢以少擊衆在塞上二十年虜人畏其

名多繪其像而瞻拜之卒年五十繼筠兒童時嬉戲必分布部伍為戰陣狀及長善射深沉有謀與士卒同甘苦子承矩字正則開寶二年從繼筠討劉崇生擒其偽將胡澄四年特除開廐副使太平興國中監兵泉州以平草寇功遷開廐使擢權知河陽徙潭州居六年端拱初除淄州刺史簽書滄州事時契丹數寇邊承矩請屯兵於順安寨西關易河溝口引水東西三百餘里南北五十七里築隄濬水以助要害太宗用其策屬霖潦為患議者多攻其失承矩援漢魏

此敘燕都水泉稻田之利井井有條使經理有法自可以佐兵民之食少省輸輓之勞

至唐故事以折之詔以承矩為河北制置屯田使民遂獲莞蒲魚蛤之利而稻田歲入亦助邊餉自是高陽並海以抵順安絕胡寇奔衝之虞又言順安至西山不遠百里亦多川源願因而廣之用息外患朝廷雖嘉之未及行也真宗即位常手疏和戎為息民之利景德初契丹修好上益善其有謀又命知雄州進本州團練使兼安撫使時虜使初至承矩以為待之禮宜得中庶可久也上嘉納久之懇求罷徙齊州卒年六十六贈相州觀察使子龜齡退齡九齡緣邊及

疑脫接字

涿易州軍民聞承矩卒無不流涕相與至雄州發哀供佛何氏世爲名將而承矩好學有文所與游者必賢士大夫有文集藏於家。平時章疏論事多適用。既卒上遣內侍就其家取存日奏疏進內。太宗知其好學喜吟詠。前後命中貴人賜以御製并書積五十餘軸。又面付手札以褒之。初除團練使真宗謂宰臣曰承矩將家子知書好名以才能自任宜授以美名。遂除英州及丐罷瓦橋詔自擇代。遂薦李允則亦良將也。承矩御下以誠同其甘苦。邊民有告機事必與歛

語無所猜忌。故虜中動息無不逆知。至道初虜騎萬餘夜逼城堞。遲明承矩出戰。斬獲甚衆。仍得其酋長虜始引去。議者猶以開關不侯命爲罪。故徙滄州。是夏魏廷式採訪河北得其功狀。朝廷遣使實覆。將士始獲推賞。承矩治滄雄州三任績効甚著。楊廷璋字溫玉真定人。祖洪裕少漁。貂裘陂有以二石鴈授之者。其翼一揜左一揜右。曰北嶽使也。是年生女爲周祖淑妃。明年生廷璋。以淑妃得賜官。遂至節度使。常鎮晉州而隰州闕守。乃請監軍李謙浦權

領州事。謙浦至隰，并人圍其城。或請速救之。廷璋曰：賊遠至，必未攻城。乃募死士百數，潛遣諭謙浦相應。夜銜枚擊之，并人大潰，逐北數十里。宋興、荆罕儒監晉州兵，疑廷璋周之近親，欲圖之。見必懷刃，而廷璋接以至誠，卒不敢發。周祖常諭廷璋，圖涇帥史懿，廷璋屏左右，示以詔書。懿受代入朝，遂免禍。時論以罕儒之不能加害，為若有施報也。廷璋被詔，單騎朝覲，加檢校太尉。

原本溫作陽乃作其

王審琦，字仲寶，河南人。仕周，至防禦使。沈毅善謀，所

至有政績。世宗征淮，舒州堅壁不下，以郭令圖為刺史，命審琦司超將兵攻城，一夕拔之。令圖入，復見逐於郡人。審琦方進軍，援黃州，聞令圖被逐，乃選騎銜枚襲城，夜敗其衆，而復納之。遂以兵破紫金山。世宗圍濠梁，審琦先拔其水寨，乃降。及攻楚州，審琦料淮人城陷必遁，設伏待之。卒墮計中。宋興，從太祖親征，李重進論功，除忠武軍節度使。在鎮累年，寬簡使民，屬邑令有以罪黜縣胥者，僚佐以為令不先白，是輕主師也。請詰其罪。審琦曰：五代以來，諸鎮暴橫，令宰

○有○之○度○有○識○之○言○
 之職不振久矣。能斥黜吏，是可賞也。聞者歎服。在官歲得租課量入而用，未常橫斂。卒贈瑯琊郡王子承衍尚昭慶公主。

符彥卿字冠侯，宛丘人。父存審，後唐節度使，封秦王。五代史有傳。彥卿初仕莊宗於太原，郭從謙之亂，左右皆去。惟彥卿與王全斌力射殺數十人。莊宗遇害，慟哭久之。天成中大破契丹於喜山，至晉領同州節度。兄彥饒以滑臺叛，上表乞歸田里。晉釋不問。契丹寇河朔，彥卿駐澶淵。高行周被圍於鐵丘，諸將相顧

無敢當其鋒。彥卿獨以數百騎奮擊，虜遂遁。行周獲免。開運二年，契丹十餘萬衆圍晉師於陽城，城中無水。人馬多渴死。會大風揚塵，彥卿遂與張彥澤、皇甫遇謀乘勢決戰，虜敗。戎主乘橐駝而遁，車帳兵械悉為彥卿所獲。及德光入汴，召而責之。彥卿曰：「臣事晉主，不敢愛死。今日惟命。」德光笑而釋之。即遣歸鎮武寧。方徐宋閒，盜賊蠡起。彥卿至埽橋，遇賊李仁恕，擁衆數萬攻徐州。彥卿至城下，賊控馬首請同入城。彥卿之子昭序自城中遣人大呼曰：「相公助賊何也？」城

不可入賊之計不行相率拜馬前而去漢祖得天下封彥卿魏國公至周封衛王加太傅改魏王宋興加太師開寶三年引疾納節鉞退居洛下八年間乘小駟游佛寺名園人服其曠達性不飲酒謙恭待士對賓客清談終日不及世務為將有謀善戰所得俸賜皆分給士卒故人樂為用卒年七十六周世宗皇后及太宗皇后皆其女也周恭帝及太祖兩朝俱賜詔不名虜自陽城之敗畏不敢呼其名馬不飲齧則叱之曰此豈有符王邪虜主北歸其母問人曰符王安

在對曰鎮彭門曰符王不來何其失策之甚其為契丹所憚如此

原本將下有家字樂下脫為字

王全斌太原人父在唐為岢嵐軍使私畜武士莊宗疑而召懼不敢行全斌曰上疑有異志矣若以全斌為質則釋矣父如其言全斌因得隸莊宗帳下歷晉漢閒積官至節度觀察畱後宋興除節度使平蜀民訟其培克貶畱後開寶未復領節制卒年六十九凡貶黜十年怡然自得性輕財故士卒樂為之用曾孫凱字勝之其祖審鈞全斌子也審鈞以擊賊而死其

子遂徙居京兆家富於財凱日散施結客與少年馳獵南山下或踰月不歸民有訟其踐田苗者收至府寇準守京兆見而奇之乃言於朝廷以全斌平蜀之功而審鈞復死於忠義當錄其後遂除凱三班奉職累擢閤門祗候鎮定邢趙都巡檢使元昊反徙監麟州兵以功遷至節度觀察畱後馬軍副指揮使卒年六十六贈節度使諡莊恪子緘彭處仁大方處厚鎮特偉初凱九年在河外數以少擊衆有功因明鎬論奏乃加進擢

李謙浦字德明太原人少通左氏春秋仕晉爲西頭供奉官至周任刺史常監晉州兵以偏師屢挫太原而屠城掠地錄功爲多隰州闕守晉帥楊廷璋請謙浦權領州事至隰濬城隍嚴兵備未旬日而并人至方盛暑謙浦服絺綌搖羽扇引二小吏登城徐步并人望之勒兵不敢動因以敢死士百數夜縋城與廷璋軍銜枚薄賊營破之逐北數十里斬首千餘級建隆初改慈州刺史久之詔與孫建進沈繼深王睿進兵太原略地謙浦爲畫出入進退策衆不能用及班

師又謂曰。今退兵。彼必來乘我。宜整衆爲備。諸將亦不答。而爲并人所襲。狼狽奔走。獨謙浦兵成列。并人遂卻。復移隰州刺史。築保安平。同等寨。敵人十年不敢犯境。有招收將劉進。勇力絕人。屢以少擊衆。并人惡之。潛爲蠟丸書。佯遺道上。晉帥趙贊得之。以聞。太祖詔謙浦械進。闕下。謙浦言。并人反。閒欲我殺之也。臣願以血屬保其無它。太祖爲釋進。賜金帛。開寶中。名爲濟州團練使。會邊將失律。復詔還莅隰州。其後以疾至京。卒。年六十二。子允正。允則。謙浦慷慨重然。

諾所賜優厚。皆分遺將士。故爲其所用者。莫不盡力。允正。字修已。頗讀書。居官嚴毅。多行殺戮。官至河州團練使。卒。允正常質其居。太宗召謂曰。汝父二十年守邊。止有一第。何故質之。曰。妹適陳王。貧無以具禮耳。詔爲償值。而還其第。縉紳多賦詩美之。

允則。字垂範。以父任爲濟州衙內指揮使。謙浦卒。任左班殿直。少以才略聞。太平興國七年。初置靜戎軍。權場。特命允則領之。自是屢奉使諸路。知潭滄雄鎮。潞州。而雒州常再莅焉。除寧州防禦使。卒。年七十六。

子中和中吉中謹初允則在閭門凡下諸路宣敕真宗必付允則視審而後行京師諸河水門及鄭州水磴皆淳化中允則所開治湖南民歲輸絹謂之地稅絹又屋每閒出絹一丈三尺謂之屋稅絹始戶給一牛歲輸米四斛牛斃猶輸謂之枯骨稅皆馬氏暴斂之餘允則治潭州悉奏除之湖湘山田民不耕墾允則下令給諸軍芻皆輸粟藁由是山田遂無遺利潭州舊分兵戍邵州允則謂蠻不擾而益戍兵是長邊患也亦遂奏罷初至滄州葺營壘多開井泉言者以

爲擾未幾北寇圍城近郊老幼皆入城保而水不乏又斲冰代砲積成淤泥虜兵遂解真宗召而語之曰頃有言卿擾民者及寇至始見利也王超之敗人心危動允則勸使衰經向師而哭以解衆忿仍趣整師以進真宗聞而降手詔褒勵雄州權場禁通異貨邏者獲珉玉帶及婦人首飾交易者允則縱之曰此以我無用易彼有用也周世宗始以瓦橋關置州居民惟結茆允則教以陶公私營造皆易爲瓦甃矣又合外舊甕城與大城爲一始創關城焉濬濠起月隄環

此傳敘次
興利除害
及守禦謀
略皆出人
意表真賢
將也然非
得此妙筆
亦不足以
傳之

以溝塹增廣闔承翰所修屯田架橋引水作梁構亭
榭列堤道以通安肅廣信順安軍所以設險者備矣
舊城樓可望十里以為斥堠允則曰南北通好安用
此為命毀之後乃徙浮圖於北原上所望踰三十里
將為新城先建東嶽祠自以黃金百兩為供器導以
鼓吹民間競以金銀器獻久之密撤去而捕盜移文
北界因以護祠為言興版築城就而虜不知也雄州
上元舊不放燈允則結綵山聚優樂縱民夜遊諜知
虜人欲觀燈乃率同僚會城北俄有衣紫胡人至出

末段數語
總束包括
簡嚴最有
精彩

○妓○女○列○侍○延○之○傳○舍○劇○飲○而○罷○密○使○縱○所○乘○騾○遁○去
○即○幽○州○統○軍○也○後○數○日○聞○為○虜○主○所○誅○矣○常○宴○兵○而
○甲○仗○庫○火○終○宴○不○救○後○真○宗○問○其○故○曰○兵○械○警○火○甚
○嚴○當○宴○而○燔○姦○人○欲○以○計○見○動○若○捨○宴○救○火○其○誰○不
○它○窺○測○也○真○宗○善○之○景○德○以○後○國○信○往○還○儀○制○及○所
○費○用○皆○其○所○裁○定○智○識○開○敏○處○事○審○當○其○方○略○施○設
○雖○游○觀○亭○傳○莫○不○有○所○寓○也
原本斷冰說作以水趣作趨獲作以新城
說作觀戰諜並作謀亭下脫傳字
○賀○惟○忠○沂○州○人○初○隸○周○世○宗○藩○邸○召○補○供○奉○官○不○辭
○而○去○世○宗○怒○及○即○位○不○復○用○宋○興○擢○儀○鸞○副○使○知○易

州以功就遷本州刺史知書曉兵法撫士卒能得其心乘障用兵所向無敵在易州十餘年契丹不敢南牧及卒以其子昭慶爲供奉官

姚內斌平州人少事北虜周顯德末世宗北征太祖將兵至瓦橋關內斌爲關使開門請降世宗以爲汝州刺史乾德中改命慶州十餘年戎不敢犯塞稱之爲虎卒年六十四

董遵誨范陽人有方略善御夷狄守通遠軍十餘年蕃漢悅附

王彥昇字光烈本蜀人後唐平蜀徙居洛陽顯德末以散員指揮使從太祖北伐至陳橋以軍中擁戴而還彥昇先入殺韓通太祖怒之出爲唐州刺史久之徙原州防禦使卒年五十八彥昇殘忍在原州戎人有犯漢法者會賓客則引而前以手捽其耳對衆大嚼沃以卮酒前後虜中有無耳者皆彥昇所殘也故竝塞數年戎人畏之無犬吠之警

趙贊字元輔幽薊人父延壽尚後唐明宗公主五代史有傳贊七歲應神童明宗賜童子及第附長興春

榜延壽守上黨并其父德鈞皆陷虜中贊獨與母在洛陽晉祖由魯援立命贊奉母北歸贊在晉末受虜偽河中節度使虜北歸得畱鎮河中漢祖起晉陽贊因勸進改京兆尹周世宗征淮南畱贊與諸將圍壽陽諸將皆敗贊獨有功及移軍天掃片瓦無棄者淮南平贊功居多乾德初授晉州刺史兼建隆軍節度使太宗卽位來朝而卒贈侍中贊喜讀書接人有禮才長於御衆所至吏民畏服

李漢超字顯忠雲中人仕周至殿前都虞候宋興累

齊州愛之
關南訟之
豈前後殊
輟邪抑風
土之淳漓
異也
湯云太祖
于此事得
情得理有
恩有感御
將如此可
謂盡善不
計所費用
以養士尤
爲強兵之
要未可以

遷至齊州防禦使關南兵馬都監有善政齊人愛之詣闕求立碑太祖命徐鉉爲文賜之刻石太平興國間除觀察使卒贈忠武軍節度使檢校太傅漢超知人疾苦善撫士卒死之日軍中皆殞涕初在關南人有訟漢超強取其女爲妾及貸而不償者太祖召而問之曰汝女可適何人曰農家也又問漢超未至關南契丹如何曰歲苦侵暴曰今復爾邪曰否曰漢超朕之貴臣也爲其妾不猶愈於農婦乎使漢超不守關南尚能保汝家之所有乎責而遣之密使諭漢超

後來之弱
歸咎于極
酒釋兵權
也

曰○亟○還○其○女○并○所○負○朕○姑○貫○汝○慎○勿○復○為○也○不○足○於○
用○何○不○以○告○朕○邪○齊○棣○監○酒○之○利○數○倍○他○郡○何○繼○筠○
在○棣○漢○超○蒞○齊○皆○得○用○以○養○士○而○朝○廷○不○計○其○所○費○
楊美字仲和太原人仕周至刺史建隆初為北海軍
使乾德初征蜀召委以軍政民詣公車乞畱者數百
人詔遣還不從答其為首者始去其治尚簡易民愛
之如此蒞軍亦為衆所服任氣好施俸賜悉以賙親
舊官至節度使死之日家無餘財
郭廷謂字信臣其先彭城人唐末居淮甸父全義為

江南觀察使廷謂初有氣槩頗讀書父卒監濠州兵
周世宗征淮破紫金山之衆至渦口夾築壘為浮梁
扼濠壽廷謂率水軍犯之世宗又命武行德率師屯
定遠以逼濠州廷謂襲敗行德李景遂擢廷謂本州
團練使及世宗攻濠勢已危蹙累詔招諭廷謂曰世
受江南大恩不敢輕去就願聽稟命金陵世宗許之
及使還廷謂望金陵大慟再拜然後以城降世宗曰
江南諸將惟卿斷渦口橋破定遠寨足以報李景祿
矣濠上使李景自守亦何能為乃授以亳州防禦使

復帥濠兵攻降天長在亳有政績乾德初改絳州防禦使蜀平以觀察使知梓州民便其政卒年五十四廷謂有士君子之風

原本廷俱訛作延

李懷忠涿郡人始事太祖爲牙校以功累擢至大同軍節度使太祖洛京郊祀愛其山川形勢有遷都意莫敢言者懷忠乘閒曰汴都歲漕江淮米四五百萬解贍軍數十萬計帑藏重兵在焉陛下遽欲都此誰與共處邪上悟亟還京懷忠太平興國中卒

郭進涑州人少傭作有膂力多結豪俠飲博人有欲

殺之者富人婦竺氏陰告之乃之晉陽漢祖畱帳下北寇屠安陽漢祖遣進拒戰虜敗走以功除刺史及德光盜據汴京復北歸進請以奇兵閒道入洛州因定河北諸郡仕周改登州刺史郡多寇盜進悉爲翦除吏民願紀其事詔近臣撰文賜之改刺衛州河朔盜匿汲郡山閒者稍衆閒出攘奪久不能滅進往攻勦絕民以安居改洛州團練使郡人誦其善政建隆初遷防禦使久之除雲州觀察使訪竺氏已死得其女撫養以適富民時劉繼元據并門未下以進兼西

論太祖之任郭進既出且久又厚其養士之資未段總敘諸鎮見其知人善任駕馭有方故能收備邊之效也

山巡檢二十年不易其任。進聽訟善以鉤距得其情。軍政嚴肅戰無不克。太祖遣戍西山必戒之曰汝謹奉法我猶赦汝。郭進殺汝矣。以郡之租賦聽其養士卒。有司不復會其出入其待之如此。太宗征太原命進控石嶺關北虜來援晉進擊敗之并人氣喪既而為田欽祚所誣進剛忿不能辨乃自經而死。欽祚偽以暴疾聞上深悼之進喜賜人急所至有遺愛在洛州植柳種荷芰徧城中外其後郡民見之有垂涕者。太祖剗五季之弊開億世之業明於知人任將有術。

付郭進以邢州李謙浦以隰州俾制太原何繼筠以滄景賀惟忠以易州李漢超以關南俾控北虜授姚丙斌以慶州董遵誨以通遠軍王彥昇以原州俾禦西寇不易其任皆十餘年待之以不疑斬之以遠効來朝賜食殿坐遣之則賜予加等擢何繼筠以節制必示以懋功之賞餘不過沿邊巡檢欲激其進取之心故二十年閒邊無事者非適然也。
必示原本作示必

武行德太原人少負薪道遇晉祖異其所負命數人力不能舉因畱之帳下累擢至寧國軍都虞候開運

末魯主犯闕行德陷虜中僞請自効因遣送將校數十輩護所取尚方鎧甲還胡中至河陰行德謂衆曰我與若等能爲異域鬼邪辭氣慷慨涕泗橫集衆素服其威名皆曰惟命遂攻孟州城走其僞節度使崔延勳悉府庫分諸校而權領州事遣弟行友詣太原勸進漢祖喜因來河陽依行德行德以兵翼至京師漢有天下授河陽三城節度使加平章事至周加侍中行河南尹時鹽禁入城者死有抱關卒捕一鬻蔬嫗至庭行德詰之嫗曰入城有浮圖取筥中蔬視而

不售俄與卒同捕繫鹽非嫗所有也行德訊得証狀皆戮之都人畏服以爲神明建隆初改忠武軍節制開府儀同三司進太傅卒

原本輩作百儀下脫同字

隆平集第十七卷

宋曾文定公編撰

南豐後學彭期訂

武臣

馬仁瑀，魏郡人。年十六，委質周祖帳下，力挽弓二百斤。世宗命衛士習射苑中，仁瑀獨挽強，百發百中，賜錦袍束帶。從世宗親征劉崇，王師不利，仁瑀謂衆曰：主辱臣死。因躍馬大呼，引弓連斃將卒數十。氣始振，崇遂敗。隨世宗征淮南，登楚州永寨飛樓，距城百

步城卒詬罵左右射莫能及召仁瑀至應弦而斃建隆初以佐命功為刺史累擢至朔州觀察使卒年五

十
原本敗作罷

宋史作業

楊鄴或曰繼鄴麟州人少儻謂其昆弟他時為將用兵當如鷹逐雉兔弱冠事太原劉崇至節度使太宗征太原劉繼元降得鄴甚喜授以大將軍數日遷防禦使知代州虜攻鴈門鄴以數百騎由小徑背擊大破之遷雲州觀察使判代州授詔副潘美北征以王侁劉文裕護其軍拔雲應寰朔四州時曹彬失律

此敘楊業設謀力戰處如讀項羽紀刺客傳令人可悲可涕何等筆力湯云岐溝陳家谷之敗彬退師援餉已失蓋因部下諸將聞美與重進累捷恥已無所攻取意在爭功而彬不能禁

於岐溝詔美護四州民徙內地既而虜復破寰州鄴謂侁等曰賊勢盛不可與戰姑密諭雲朔等將先出寰我師次應州賊必悉衆來拒俾朔州吏民直入石碣谷列強弩千人於谷口以騎士援於中路則三州之衆萬全矣侁沮之文裕亦欲鄴赴敵鄴曰此必敗之道也侁曰君侯素號無敵見敵逗撓豈有它志鄴曰非愛死特殺傷士卒而功不可立耳即率帳下自石朱路趨朔州將行泣謂美曰鄴太原一降將上不殺而授以兵柄非縱虜不擊欲圖報萬一也諸君責

隆平集 卷十七

遂裹糧趨
深以至手
敗至楊業
之不欲出
兵而王侁
激之業不
得已相期
轉戰谷口
為夾攻計
美與侁既
陣于谷口
以待及侁
登托邏臺
一望以為
契丹敗走
意欲與業
爭功遂離
谷口美不

隆○平○集○卷○十○七○
鄴○以○避○敵○當○即○死○矣○因○指○陳○家○谷○口○曰○君○侯○於○此○張○
步○兵○強○弩○以○援○使○鄴○轉○戰○至○此○失○援○則○無○遺○類○也○美○
與○侁○陣○於○谷○口○自○寅○至○巳○侁○使○人○登○托○邏○臺○望○見○虜○
敗○欲○爭○其○功○即○引○兵○離○谷○美○不○能○止○乃○行○二○十○里○聞○
鄴○敗○帥○兵○卻○走○鄴○力○戰○至○暮○望○谷○無○人○撫○膺○大○慟○其○
子○延○玉○死○焉○帳○下○兵○殆○盡○猶○手○刃○數○十○百○人○因○重○傷○
為○虜○所○獲○太○息○曰○為○姦○臣○所○逼○王○師○敗○衄○不○食○三○日○
而○死○陣○將○陷○麾○下○猶○餘○百○人○鄴○謂○曰○汝○曹○各○有○父○母○
妻○子○速○去○尚○有○生○還○報○天○子○者○無○與○我○俱○死○於○此○皆○

能制卒陷
業于死是
二者皆起
于爭功之
故美不能
制王侁彬
亦不能制
諸將何也
一念之私
遂貽國家
無窮之禍
蓋三路出
兵事權不
一而又以
屢勝而驕
故也使如
太祖時有
所當責而

流○涕○不○去○無○一○獲○還○時○淄○州○刺○史○王○貴○亦○死○焉○鄴○勇○
而○有○謀○與○下○同○甘○苦○代○北○苦○寒○未○常○獨○設○炭○為○政○簡○
易○郡○民○愛○之○天○下○聞○其○死○皆○為○之○憤○歎○上○尤○痛○惜○之○
贈○節○度○使○北○征○之○役○曹○彬○岐○溝○之○敗○至○拒○馬○河○軍○民○
牛○馬○相○踐○蹂○而○死○者○甚○衆○彬○貶○右○驍○衛○上○將○軍○及○鄴○
陷○沒○潘○美○削○官○三○資○時○雍○熙○三○年○之○春○夏○也○是○年○十○
二○月○復○命○劉○廷○讓○再○舉○北○伐○之○兵○而○全○軍○陷○於○君○子○
館○廷○讓○馬○斃○三○易○馬○始○以○身○免○三○將○繼○衄○沿○邊○瘡○痍○
之○卒○不○滿○萬○計○料○鄉○兵○城○守○皆○不○習○戰○事○僅○自○固○而○

授之以劍
當不至一
敗至此

已。淡。祁。德。州。既。常。不。守。魏。博。之。北。彫。弊。為。甚。鄴。之。子。
 延。朗。其。後。緣。聖。祖。諱。而。改。曰。延。昭。以。鄴。蔭。補。供。奉。官。
 鄴。及。延。玉。俱。死。太。宗。憫。之。擢。延。昭。崇。儀。副。使。咸。平。二。
 年。契。丹。入。寇。延。昭。在。遂。城。城。小。無。備。衆。心。危。懼。延。昭。
 集。城。中。丁。壯。護。守。偶。大。寒。命。汲。水。注。城。外。及。旦。冰。堅。
 滑。城。不。可。近。虜。遂。解。去。遷。知。莫。州。三。年。契。丹。復。寇。邊。
 延。昭。伏。銳。兵。於。羊。山。之。西。自。北。掩。擊。且。戰。且。止。及。伏。
 發。虜。衆。敗。績。獲。其。名。王。函。首。以。獻。加。本。州。團。練。使。與。
 楊。嗣。竝。命。真。宗。謂。宰。臣。曰。嗣。及。延。昭。以。忠。勇。自。効。忌。

妬者衆。朕力芘之。以及於此。景德初。胡馬南寇。延昭。
 領兵虜地。破古城多所俘獲。會修好。乃止。徙高陽關。
 副都部署。在屯九年。官至英州防禦使。卒年五十六。
 詔錄其子傳永。德政文廣有差。門客之類亦試藝。而。
 官之。延昭於吏事非所長。軍中訴謀皆決於小校周。
 正。上知而不責。第戒飭小校而已。然其智勇善戰。沈。
 默寡言。平居未常問及家事。所得俸賜均遺士卒。奉。
 已簡質。出入騎從如軍校。號令嚴明。同士卒甘苦寒。
 不披裘暑不張蓋。遇敵必身先。功成推其下。故人樂。

從宋史加周正字

為用威震異域守邊二十餘年虜情畏服止呼曰楊六郎其卒也河朔之人皆望柩殞泣

原本諸君君字訛軍兩延玉五字並訛昭案訛不號上多法字

王彥超字德昇魏郡人少事魏王繼岌在晉為刺史漢為防禦使周節度使兼侍中建隆初加中書令改授二鎮封邠國公以太子太師致仕卒年七十三累朝皆有戰功時以為彥超居富貴能知止足

雷福徐州人屢有戰功開寶閒以觀察使判雄州凡五年政尚平易民甚便之詣闕借雷詔為立遺愛碑卒贈節度使福既貴諸子欲治第福怒曰我受厚祿

矣足以庇汝曹平日以身許國猶未有尺寸効更欲居大第為自安計邪太宗聞而喜之其卒也賜金五千兩市第卹其家

宋史雷作劉

荆罕儒范廷名皆冀州人少為盜王晏字鎮時徐州人王景字象珍東萊掖人元達洛州人錢守俊濮州人譚延美大名人世宗既戮何徽樊愛能輩乃擇驍勇士為將而擢罕儒為團練使建隆初加防禦使晉州鈐轄恃勇輕敵常懸軍深入虜獲甚衆一夕至京土原劉鈞遣兵追躡之罕儒方據胡牀饗士錦袍裹

甲遂直犯賊鋒爲人所殺河東久畏其勇欲生致之及死求殺罕儒者悉誅焉太祖亦深嗟惜罪京土原之不用命者而官其子加等廷名以勇力應募爲軍職在周爲殿前右番指揮使開寶間累遷至鐵騎都虞候太平興國二年契丹內寇密邇魏博三年春廷名大破之斬首萬餘級追奔莫州餘寇悉遁未幾卒贈侍中晏開運末爲陝西軍職與都校趙暉侯章謀害耶律德光僞命陝帥劉愿奉表於漢祖漢祖威聲未振而晏等歸之甚喜卽授以節度使及入汴加

從新編加劉愿字

平章事周錄其敗劉崇功改武寧節度使封滕國公因其鄉里以榮之也建隆初以上將軍致仕卒景自後唐爲軍職以功累擢至周爲節度使加中書令宋興進封太原郡王卒追封岐王達初事晉邸太宗卽位累擢至封州觀察使卒贈節度使守俊事太祖於潛宮屢有戰勞髮後有七黑子如斗在民間時有鄉人目爲草中鶴言其勇鷲也積官至潘州防禦使卒年八十二延美仕周至控鶴副指揮使建隆初除指揮使累至觀察使常知寧邊軍胡騎驟至城下延美

命開門誘之圍城數月開門如故虜卒不敢入而遁久之請老以上將軍致仕卒年八十三贈節度使罕儒及景皆輕財好施折節下士有稱於時

原本偽作爲誘下脫之字

高瓊家世燕人父乾徙居亳州蒙城縣瓊少時在外寢一夕父往視之若見有披金甲而侍其側者父潛異其事及長而材勇給事晉邸累擢至殿前都指揮使卒年七十三子繼勳繼忠繼宣繼勳字紹先初補殿直太宗見而奇之擢寄班祗候咸平初監兵益州王均叛繼勳引兵與戰賊黨轉鬪至嘉州界敗之復

還力攻益州城而王均夜潰以功遷崇儀使徙綿漢劔門都巡檢悉擒滅均餘黨楊承海等衆徙陝口鈐轄還朝陳用兵方略真宗嘉之除宮苑使并代州鈐轄徙岢嵐軍寇襲草城州繼勳謂軍使賈宗曰虜雖衆而不成列是無主帥也急擊之可成功因設伏要害與接戰寒光嶺伏發斬獲甚衆遷弓箭庫使賜金帶錦袍自是累擢威武保順昭信軍節度使景祐初以年高進見節其拜特許以子扶掖未幾辭管軍遂改鎮建雄知滑州卒年七十八贈太尉繼勳謙慎有

機略善撫士卒故戰常有功子遵度遵範遵甫遵約
遵憲遵讓

原本紹先訛終光從宋史改

黨進朔北戎人幼為天雄節度使杜重威奴重威愛
其淳謹雖長猶令與婢妾雜侍重威敗周祖得之以
為鐵騎都虞候建隆初除刺史以軍功累擢至節度
使常總禁旅不識字不記兵籍一日太祖問之舉梃
以軍司所書兵騎戎器數請上自視上益喜其朴直
巡徼京師見珍禽奇獸必放之曰不養父母反養此
邪晉邸命親吏臂鷹雛進亟欲放及乃戒之曰汝謹

養視小民傳以為笑其變詐多此類杜重威之後寒

淳謹何在

餓進常分俸以給士大夫或媿焉

欲放

呼延贊并人少為鐵騎卒太祖愛其武力擢為軍校
屢以戰功遷至團練使卒贊忠實有勇徧體文以赤
心殺賊字妻子奴婢同爨皆然又刺鏤於鞍勒器用
之上出入有破陣刀降魔杵鐵鞭鐵幘頭兩角有刃
皆十餘斤乘騅馬絳抹額自謂慕尉遲敬德常出刺
保州請於上曰臣服飾奇異願敕郡縣清道太宗笑
而不答又請績形鄭州靈顯王廟願統陰兵滅虜太

宗常謂近臣曰贊服器詭異朕屢欲誅之既而亮無
它志也

崔翰字仲文京兆人少有大志風資偉秀太祖一見
奇之以隸麾下卽位屢擢刺史太宗蒞政進團練使
明年講武近郊命翰專金鼓軍容甚整上悅以藩邸
時金帶密賜之謂左右曰如崔翰者必不能事晉朝
言政出多門故也從征太原流矢中頰猶戰不已上
親至其帳撫之北伐班師次金臺驛大軍南向而潰
上令率衛士千餘止之翰請單騎以方略告諭衆遂

定戮一人以復命上喜因命翰征定州得以便宜從
事公邊諸軍並從節制軍市租儲聽其專用其冬會
李漢超崔彥進破北虜於徐河魯投西山坑谷死者
不可勝計俘馘數萬他物又十倍焉擢武泰軍節度
使改鎮威德軍至鎮方盜賊充斥翰誘其渠魁論以
禍福乃相率出境又徙高陽召還以疾畱京師疾聞
見上曰臣不願死於家馬革裹屍足矣上壯其言復
命赴所治卒年六十三贈侍中翰沈毅有謀所至多
成功輕財好施死之日家無餘貲

解暉洛州人。自後唐隸兵籍。凡受詔征伐。必身先士卒。臨敵所難者。暉處之。若甚易。金瘡被體。幾無完膚。建隆以來。屢有攻伐。積官至團練使。卒年八十。曹翰。魏郡人。少爲郡小吏。周祖鎮鄴。奇之。以隸世宗幕下。世宗鎮澶淵。以爲牙校。及尹開封。翰猶在澶淵。聞周祖寢疾。不俟召。來見世宗。密言曰。王爲冢嗣。不侍醫藥。何以副天下望。世宗悟。入侍禁中。以府事命翰總決。卽位。補供奉官。稍遷樞密承旨。世宗征淮南。畱鎧甲千數在正陽。旣而遣降卒八百來京師。翰遇

於道。懼其過正陽。劫兵器。叛。盡殺之。世宗不加責。乾德中。伐蜀。以翰帥荆襄。鑿山開道。商旅以濟。又詔兼漕運。而糧餽不乏。蜀平。全師雄擁衆十萬。叛。翰與曹彬。劉廷讓討平之。又軍校呂翰盜據嘉州。翰及諸將奪其城。謀知賊欲三鼓復攻城。誠擊柝使。緩向晨。猶二鼓。賊衆不集。而潰。遷蔡州團練使。從征太原。會河決。詔翰董役。指日而訖。事後復有決。其績用亦然。曹彬平江南。翰獨下池陽。而煜將有胡則者。以江州拒命。翰遂屠其城。得公私金帛億萬計。僞言欲致廬山。

有載字

羅漢鑄像於闕下詔從其請因調巨艦十百同所得以歸朝廷涵容不加詰問錄其功授桂州觀察使判穎州復從太宗征太原因伐幽州命翰軍東隅有卒得蟹以獻翰謂諸將曰蟹水物而陸居非其所也又能行不能進則城不可進拔之象其班師乎卒如其言師還除威塞軍節度使仍判穎州未行詔翰督役開河南自雄至莫以通漕運翰遣徒伐巨木於虜地授五騎以五色旗為斥候如遇寇則舉白旗之類又起烽燧於境上虜疑而不敢近塞事遂濟乃歸鎮居

宋史有望字

數歲汝陰令孫崇訟其不法鞫得實削奪官爵送登州久之復千牛衛上將軍卒年六十五贈太尉咸平初賜諡武毅翰天資殘忍貪冒多智數喜誕妄飲酒至數斗不亂對上奏事雖數十條皆嘿記不少差開原作關翟守素北海人仕周至刺史宋興累擢商州團練使卒年七十一自漢策名將六十年以謹厚自持所至稱治建隆閒麟府內屬戎人爭地不決因擾邊民詔守素馳傳以諭曲直莫不悅服梅山峒蠻人叛又詔守素討平會陰兩弓弩筋角解弛詰朝將接戰而夜

削木爲弩。遲明大破其衆。焚蕩巢穴。賊首包漢湯者。與數郡大吏富民交結。守素獲其私書。悉焚之。以安反側。守素建隆之前。已在高列。而後進多秉節鉞。獨守素二十年不遷。而能恬不爲意。

原本將六十將字作俯

折御卿累世邊將。奄有麟府之地。祖從阮父德展。皆永安軍節度使。德展卒。御勳爲留後。開寶九年。來朝授泰寧軍節度使。未行。卒。朝廷遂降告敕。授御卿開府使。改爲崇儀使。知府州。以功擢至本州觀察使。未幾。率兵大敗戎人於子河。汭除永安軍節度使。自是戎

虜不敢深入寇。一日虜將韓德臧爲李繼遷所誘。內

新編臧作威

侵方御卿被病。力疾出戰。虜將聞其來。不敢進。旣而疾亟。母令人召歸。御卿曰。世受國恩。虜寇未滅。御卿之罪也。臨敵棄士卒而歸。邪太夫人勿見念也。言訖。

泣下。翌日卒。年三十八。贈侍中。錄其子惟正。知留務。侯延廣。西河平遙人。太子太師益之孫也。延廣年十歲。父仁矩爲德州刺史。有虜騎數十入城。延廣領數騎馳出牙門。射殺其酋領。仍斬首數級。悉擒其餘黨。太祖聞而奇之。就賜錦袍金帶。仁矩卒。擢延廣供奉。

官河西叛卒劉渥嘯聚寇耀州郡邑皆城守延廣輕兵閒道追及於富平而渥等千餘人傳言謂延廣曰公家世富貴奈何與亡卒爭一旦之命也延廣亟挺身與鬪斷渥右臂亡走爲兵追獲因大破其衆關右平擢刺史知靈州趙保忠方與繼遷通謀上遣李繼隆問罪以延廣護其軍定夏臺就擢知延州先在靈武戎人悅服護軍康贊元害其功誣奏延廣得虜情恐難制遂以慕容德豐至部不治及繼遷寇靈武乃復授延廣團練使知靈州時戎虜塞道延廣獨引數

騎之鎮繼遷畏其威望虜皆避之至郡未幾卒年五十垂絕猶曰今日雖得死所獨恨無功報國耳田重進范陽人周顯德中應募爲卒隸太祖麾下積戰功至刺史太宗卽位累擢除節度使領飛狐路都帥破虜衆獲其驍將大鵬翼并契丹游渤海三千餘人斬首數千級逐北四十里下飛狐靈丘數城以功改鎮彰化軍京兆尹卒年六十九贈侍中太宗在藩邸愛其忠勇常遺以酒炙不受使者曰晉王賜何敢拒曰我知有天子不知晉王何人也太宗益嘉其無

私交。

盧斌開封人。始以筆札給事晉邸。太宗卽位，補殿直。雍熙三年，北伐，隨軍至岐溝。王師之敗，曹彬憂之，斌請以千弩斫寨。虜遁，移軍夾河。旣克涿州，畱萬兵，令斌守。斌以爲深在虜境，守之無益。彬命斌擁城中老幼南徙易州。彬振旅爲虜所乘，諸將皆以失律被譴。獨斌常建議棄涿州，獲免。端拱中，賊劉湜、侯和尚劫興平、櫟陽，斌爲永興、華州巡檢。薄南山，渡渭水，擒滅無遺。遷供奉官，移梓。遂十二州都巡檢，仍許以便宜。

從事淳化二年，賊任誘寇昌合州。三年，富順監蠻攻榮州，斌皆討平。旣而草寇結黨，鈔略榮、戎、資州。富順監斌又擊滅之。是冬，李順亂，斌以兵六百人趨成都，斬賊數萬級。明年，成都陷，斌還梓州。賊渠相里貴衆三十萬薄城，城中兵止三千。斌感勵士伍爲固守之。計閒出與賊擊刺，賊稍卻。復集機石、連弩、衝車、雲梯、環城、矢石如雨。斌與州將張雄、隨機設備，圍閉八十日。王繼恩援兵始至，斌開門迎勞。王師賊遂潰散。斌因勢追斬及納降二萬餘人。又蓬閩閒斬獲千計。賊

平以功除刺史在川峽六年數以孤軍禦強寇功效最著及平梓綿漢州賊黨方代還遷東上閤門使建言閬州北葭萌路可直入利州若焚棧道劔門之路險不足恃也請立寨柵從之卒年五十一斌善料敵不失機會

及平原作其平

趙延進澶州人父暉官至太子太師五代史有傳延進以父任累遷至右千牛衛將軍乾德中伐蜀以延進知襄州漢水壞隄歲損民田爲累石岸其患遂絕

李繼隆將兵禦之仍賜陣圖分兵爲八隊俾奉以從事至蒲城虜全集乘高望之不見其際翰等

布陣相去百步士衆疑懼延進曰

衆若此而我師星布其勢相遼不如合擊之違令而獲罪不猶愈於辱國乎翰等曰萬一不捷爲之柰何曰延進願獨當其責遂改爲三陣三戰虜衆大潰以功遷右屯衛大將軍知鎮州民詣闕借畱許一年改知揚州徙并代州鈐轄又知相州

隆平集卷十七
 武臣
 魏丕字齊物相州人少業儒周世宗鎮澶淵奏為司
 法參軍後改授武職太平興國中官至刺史常對太
 宗願除臺省官上諭之曰知卿本儒生然兩省不若
 刺史俸優也屢求退以左衛大將軍致仕卒年八十
 二不好為歌詩有東亭集六卷常咏山鵲人多誦之

隆平集第十八卷

宋曾文定公編撰

南豐後學彭期訂

武臣

魏丕字齊物相州人少業儒周世宗鎮澶淵奏為司
 法參軍後改授武職太平興國中官至刺史常對太
 宗願除臺省官上諭之曰知卿本儒生然兩省不若
 刺史俸優也屢求退以左衛大將軍致仕卒年八十
 二不好為歌詩有東亭集六卷常咏山鵲人多誦之

安守忠字信臣。父審琦爲周節度使，封陳王。五代史有傳。守忠以父任仕周，至鞍轡庫使兼刺史。乾德中蜀平，以守忠任漢州刺史，每遣使必戒之曰：「安守忠能律已，汝輩當效其爲人。」至道中擢爲節度觀察，畱後久之卒，年六十九，贈太尉、常判雄州。方宴賓，聞吏言有軍校謀變，守忠笑顧坐客曰：「此輩酒狂耳。」計未及發而就擒焉。人服其能鎮物。

原本陳下脫王字任上有正字

楊允恭，漢州綿竹人，世富於財。乾德中王師平蜀，允恭方弱冠，率鄉里子弟置寨於清泉，爲賊所得。允恭

給之曰：「苟活我當相助。」賊釋之，因厚結賊之子。一日賊欲加害，其子密以告，遂遁去。以策干丁德裕，權補爲綿竹巡檢。賊平，赴闕補殿前承旨。太平興國間監兵英州，入奏海賊官不能制，又民販海鹽入嶺北者衆，請建大庾縣爲軍，詔卽以大庾縣置南安軍，授允恭廣連都巡檢。自是冒禁者少，而允恭擒捕海賊殆盡，詔獎之。自殿直特遷供奉官，改崇班。緣江多盜，又命領江南催綱捕盜事。至臨江軍，擇驛卒具輕舟伺賊所在，夜出捕其首者百數，又趣通判躡海寇。寇張

○疑脫爲字

幕設強弩短礮礮傷允恭肩血汚衣神色不動密遣善游水者以鐵鉤毀其幕進擊之斃於水者大半猶生擒百人江路平遷洛苑副使都大江淮兩浙發運捕賊事賜金帶先是三路轉運各領其事而上供米歲不過三百萬允恭盡籍三路州卒牙吏自發運所輸泗州自泗州輸京師歲數遂倍改作坊使充發運使官置權場計置買江淮所產茶舊不較精粗久不售而腐者悉焚之允恭具等色年次而給焉遂絕其弊淮南十八郡而九郡行鹽禁允恭以爲行法不一

抵冒者衆寇盜之生莫不由此請均禁止三司沮其議而允恭力請不已太宗卒從其請又以廬州廬江縣巢縣去州稍遠故多寇盜詔遂建爲軍允恭積官至江州刺史卒年五十六賜其子同學究出身李順之亂其兄自榮據綿竹縣而允恭之兄允升弟允元率鄉子弟擒自榮以獻太宗嘉之授允升本縣令允元什加縣尉明年竝名赴闕除允升贊善大夫允元大理評事云

原本廬說虛

張永德字抱一并州人世以財雄邊父穎在周爲防

禦使五代史有傳周祖與穎善以女妻承德既爲樞密使遂表承德授供奉官押班後二年漢命承德押賜昭義軍節度使常遇生辰禮物遇周祖之外兄弟也周祖時鎮鄴有密詔付遇承德在潞州聞之因謂遇曰郭侍中被讒今日之詔得非莅殺承德邪承德卽死竊恐累君耳遇驚曰何謂也曰姦邪蠹政郭侍中誓清君側願且以承德屬吏少俟其隙君獨不聞郭侍中事邪請具言之明宗起鄴柴翁以女備掖庭至洛失寵出宮過鴻溝遇雨夫人歎曰業緣在此矣

乃出匱中物計直千萬異人奇事寫得妙有姿致以半奉其父母令歸鄴因請曰溝傍傳舍長郭君貴人也願歸之父母大媿終不能奪既歸周祖而謂之曰妾奩中物五百餘萬以資君時不可失也周祖持賂軍司得主書計遂至通顯柴翁者常獨居室人以爲司冥事一日笑不已妻問其故不答翁嗜飲妻醉之以酒乃曰上帝有命郭郎爲天子妻頗漏其語遇聞而未甚然之及承德言遂信故止令壯士嚴衛承德未幾周祖使至遇賀且謝曰老夫幾誤大事周祖踐祚除承德左御將軍駙馬

都尉從世宗征劉崇高平之戰何徽樊愛能退衄時
太祖及永德衙兵各二千人而已太祖曰賊氣方驕
公麾下頗能步射可西出陟高而止吾張左掖以應
之其勝可必永德亦以爲然遂大捷劉崇單騎遁去
世宗謂永德曰樊愛能何徽及福裨七十餘人吾欲
盡按軍法何如對曰必欲開拓疆宇威加四海安可
已也因曰若非趙某謀出不意則社稷幾殆矣世宗
善其言悉誅愛能輩以徇軍聲始振從世宗征淮南
破紫金山十八砦吳人樓船蔽川永德擇習水者潛

鑽其船引兵擊之溺死者不可勝計以金帶賞鑽船
者又以兵絕濠州餉道世宗手詔褒諭太祖卽位加
兼侍中改武勝軍節度使入覲道舊不名待周之舊
臣恩禮無與永德比者常問以下并汾計對曰彼兵
雖少而悍加以北虜之援未可遽也姑以閒謀離虜
心設游兵以擾其穡事俟其困弊乃可圖耳開寶末
王師征江南永德以家財具數千舟助軍糧數十萬
石優詔獎之鎮穰下十八年頗有治績永德四歲時
母馬氏被出嫁安邑人劉祚祚卒永德於南陽公宇

爲二堂。繼母劉居其左。馬氏居其右。問安視膳。皆得其權。馬氏嘗得入謁太宗。封爲莒國太夫人。劉先卒。永德爲起大第。買田以聚其族人。母之弟劉再思亦縻以官爵。永德居睢陽。比舍有書生卧疾。療之獲痊。來謝。因曰。可市水銀五兩。與之。卽以藥同置鼎中。有頃。成白金。將別。欲求其術。書生曰。吾不吝此。慮損君壽耳。仍告以太祖受命之兆。永德遂潛意推奉焉。及駐車下蔡。道傍見一僧。乃昔書生也。召與語。復問其訣。僧曰。昔語君之貴。今不謬矣。當保富貴五十年。安

用此爲永德涉獵經史。頗善吟咏。禮賢下士。故士夫多從之遊。卒於本鎮彰德軍年七十二。

原本特作得步作元市作示白作中下士下字作樂

柳開字仲塗。大名人。父承翰。仕至監察御史。開幼警悟豪勇。父顯德末。爲南樂令。有盜入其家。衆不敢動。開十三歲。亟取劍逐之。盜踰垣。開揮刃斷其足二指。及就學。講說能究經旨。開寶六年。登進士第。官至如京使。知忻。徙滄州。未至。卒。年五十四。子涉。遷居荆南。仕爲隍城使。五代學者。少尚義理。有趙生者。得韓愈文數十篇。未達。乃攜以示開。開一見。遂知爲文之趣。

疑脫州字

自是屬辭必法韓柳。初名肩愈。蓋慕之也。著書號東郊野夫。又號補亡先生。作二傳以見意。時范杲好古學。開與齊名。謂之柳范。開垂絕語。門人張景曰。吾十年著一書。可行於世。景爲名之曰默書。辭義稍隱。讀難遽曉。開尚氣自任。不顧小節。所與交者。必時之豪俊。太宗征河東。開從駕督糧。適常潤有小寇。遂選開知常州。開至治所。招誘羣盜。以俸金給賞之。又解衣與賊酋。置之左右。或謂不可。開曰。彼失所則盜不爾。則吾民也。始懼死。故假息鋒刃之下。今推以赤心。夫

豈不懷。未半歲。境內輯寧。雍熙初。坐與監軍忿爭。貶

上蔡令。會王師北伐。開部糧至涿州。遇米信與北虜

戰。久不解。遣使求開。謂信曰。兵法約而請和。謀也。亟

原脫降字

無

攻。必勝。信不能決。後二日。復引兵挑戰。謀知求降。乃

以矢盡。及幽州取至。故復戰耳。開因上書願効死邊

鄙。太宗憐之。除殿中侍御史。命使河北。又上書願賜

步騎數千。以滅胡。上方擇文臣有武略者。卽授開崇

儀使。知寧遠軍。契丹貴將白萬德本真定人。統緣邊

七百餘帳。開因其親族往來。令說萬德許以藩鎮。俾

挈幽州之衆內屬萬德喜請爲期約使未還詔徙知
 全州州西有溪峒蠻粟氏久爲邊患朝廷設峽口香
 烟等七寨不能禦開至選勇辯吏往說之不踰月攜
 老幼至州開賦其居業作時鑑一篇刻石戒之遣其
 酋赴闕授州上佐邊患遂息詔賜開緡錢三十萬會
 有黥卒訟非辜州下吏削二官頃之上書自陳復還
 舊秩知環州爲理互市之不直者戎落悅附徙知邠
 州真宗卽位遷如京使上書言時政上嘉納之又徙
 代州葺城壘戰具諸將沮議因謂其從子浩曰吾觀

虜星有光雲多從北來寇殆將至諸將見嫉一日寇
 至必危我矣卽丐小郡得沂州是秋虜犯塞

原臬字作景溪
峒蠻作蠻溪峒

王漢忠字希傑徐州人以材勇給事晉邸太宗踐祚
 累擢至觀察使真宗卽位進節度使以左衛上將軍
 卒年五十四漢忠有識略軍政嚴整所至無盜賊頗
 涉儒學好爲歌詩聚書萬卷尊儒士待賓佐有禮輕
 財好施得士卒心惟喜矜持同列多所不悅

原本給詔結

慕容德豐字日新節度使延釗之子起家如京使開
 寶中監昇州兵澤國富庶使多貪冒德豐獨以修潔

稱詔褒之。積官至團練使。卒年五十五。德豐輕財好施。世祿之厚。而家無餘貲。

王繼忠。開封人。父爲軍校。戍邊而死。繼忠因得補殿直。侍真宗在東宮。得給事左右。卽位。累擢至雲州觀察使。咸平末。契丹入寇。繼忠帥定武出戰於望都之北。自以被遇厚恩。力戰圖報。而服飾稍異。戎人識之。轉鬪累日。援兵不至。遂陷虜中。初謂已死。贈大同軍節度使。錄其子懷敏。懷德。懷政。皆加等。景德初。虜俾繼忠奏章道意。請修和好。朝廷允其請。戢兵息民。與

有力焉。自是朝廷每遣使至契丹。必厚賜之。繼忠對使臣。必泣下。常附表請召還。上以誓好既定。姑詔諭之。虜王待之益厚。改其姓曰耶律。名曰顯忠。又曰宗信。封爲吳王。

原本遇下有之字。賜下脫之字。張凝傳。原本輩作悞。仍兼作依前。

張凝。滄州人。以親衛隸晉邸。及卽位。授武職。咸平初。契丹入寇。從大將康保裔合謀。伏於瀛州西。背腹奮擊。凝陷虜中。子昭遠。十六歲。從行。乃單騎馳突。所向披靡。遇凝掖之。以出。見者驚異。西鄙有警。以凝帥邠寧環慶。兼安撫環州。轉運使劉綜懼糧不給。問計。凝

日○當○淡○入○因○敵○糧○可○勿○慮○也○自○白○豹○鎮○焚○族○帳○掠○畜○
產○以○歸○因○襲○慶○州○蕃○族○胡○家○門○等○破○之○以○其○數○犯○亭○
徼○故○乘○其○不○備○耳○殘○羗○遠○遁○邊○境○遂○安○景○德○初○詔○北○
邊○豫○設○奇○兵○寇○來○則○分○道○淡○入○以○牽○其○勢○魏○殺○首○逗○
撓○諸○將○皆○有○言○疑○獨○若○不○知○或○問○之○曰○殺○險○悍○吾○輩○
公○言○其○過○使○不○自○安○非○計○也○真○宗○聞○而○嘉○之○久○之○遷○
殿○前○都○虞○候○仍○兼○寧○州○防○禦○使○卒○年○六○十○二○贈○節○度○
使○疑○性○資○忠○義○以○功○名○爲○任○善○訓○士○卒○所○得○俸○賜○均○
及○其○下○家○無○餘○積○昭○遠○字○持○正○因○掖○出○其○父○特○授○左○

班殿直積官至昭州防禦使卒年五十贈觀察使子
克諧克已克忠克從天禧初閣門副使闕樞密院方
奏擬人真宗曰朕已有人張昭遠知邊略曹儀習朝
廷儀制可用也二人遂竝命焉昭遠所至有政績

上官正開封人少舉三傳爲鄜州攝官雍熙中授殿
前承旨屢因鞫獄遷至作坊使蜀賊李順之亂正監
兵劔門關出兵擊破其黨斬馘殆盡方朝廷以棧道
爲憂正孤軍破數萬衆其勢遂沮賞功授六宅使劔
門刺史順旣誅餘黨匿山澤閒正推恩信招來之加

峯州團練使代王繼恩爲西川招安使。至道末，叛卒劉玘陷邛漢州。又詔正討平之。累擢洛州防禦使，以環衛官分司。卒年七十五。正不畏強禦，而性頗急暴，多詬辱官吏。太宗常手札戒之。

周審，玉開封人。周顯德中，以父蔭補殿直。建隆至雍熙，擢爲作坊使。契丹入寇，潘美在定武，審玉監軍。先鋒劉緒陷賊，審玉躍馬趨擊，拔緒而還，勇冠三軍。常知鳳翔府，有僧乘傳而西，以市木爲名，威動郡邑。審玉按詰，盡得其姦狀，送闕下。時稱審玉非特有武，亦

通吏術。以左千牛衛大將軍致仕。卒年七十四。

田紹斌，少爲驍武副校。建隆初，隸崔彥進麾下。討李筠，李重進平荆湖嶺表，又從劉廷讓擊全師雄餘

黨。從曹彬征江南，皆有功。太祖伐河東，契丹援入於百弁。紹斌與何繼筠奪賊旗鼓而逐之。太平興國初，除江州刺史。詔討梅山峒蠻，斬馘萬餘，生擒二萬人。邊境遂寧。曹彬之出代州也，紹斌爲先鋒，每戰必勝。召見便殿，面授溪州團練使，加冀州防禦使。城清遠，軍進會州觀察使。爲靈州副帥，部芻糧金帛，赴靈武。

清遠軍者數十。繼遷數遣萬騎劫之。紹斌必出陣大呼。賊聞其名皆潰去。一日白守榮馬昭忠護軍儲紹斌自靈武以兵援之。數遇敵。數勝。而守榮昭忠棄輜重。與賊戰敗。紹斌爲擊走賊。護糧以行。詔褒之。俾副李繼隆帥環慶。繼隆誣以守榮昭忠落蒲河之敗。紹斌不救。有異志。貶率府副率。真宗卽位。復萊州團練使。帥延慶有野雞蕃族數寇邊。紹斌召其酋豪使斷臂截耳以誓。遂不復侵犯。紹斌常面斥劉隱及轉運使宋太初事。二人銜之。歸朝言其過。召赴闕。誣獲

辨命爲鎮定先鋒。隸傅潛。潛屯中山。虜至不出戰。石普楊嗣渡嚴浮河。頗失利。獨紹斌擒獲稍衆。復觀察使。及潛下吏亦同被鞠。復貶率府副率。後累敘。復左領軍衛將軍。康州團練使。卒。紹斌長於兵。頗知戰法。惟暴戾無檢。好凌犯人。屢以誣被黜。而不自悔也。李重貴。河陽人。常給事晉邸。及卽位。累擢至衛州團練使。淳化中。遣將五路討賊。遷重貴帥麟府。得對。因言賊居沙磧。逐水草無定止。聞兵勢盛。則遠遁矣。追之。或糧不能繼。欲守。又彼無堅壘。若未能平賊。將何

顏以見陛下也。太宗雖善其言，以師期既定，強遣之。卒無功而還。咸平三年，戎人入寇，范廷召戰，退。康保裔陷賊，獨重貴與張凝力戰，卻賊全軍，以歸。凝議上功狀，重貴曰：「大將陷歿，我輩計功，是誠何心？」真宗聞而嘉歎，特加階邑，以疾求致仕，授左羽林大將軍，卒。年五十九。

石保吉，字祐之，中書令守信之子，尚太祖第五女延慶公主。自諸將軍擢至節度使。景德初，同平章事。是年契丹入寇，真宗將行幸澶淵，先遣保吉與李繼隆

為排陣使，對壘以待。而虜騎數萬驟至城下，保吉不介馬，當其前鋒，虜甚畏憚，駕至衛南，師已告捷。及振旅，舍爵策勳，特加戶部。大中祥符三年，卒，贈中書令。謚壯武。保吉有武幹，歷世將相，家積不貲，而治生射利，所至侵擾。為魏帥葉齊查道，皆知名士。保吉悉命械頸，以督糧運物，論少之。先是守信鎮宛丘，年五十七而卒，保吉繼居是鎮，卒年與之同。談者異之。原本歷作重王中正，汀州人，賈販往來江淮間。咸平元年，至南康軍，逆旅遇異人，自言趙姓，久之，又見於茅山，命求鉛

以原、作與

神仙封禪始自秦皇以漢武之英略猶惑于方士然始迷而終悟真宗遠不逮漢武而邪臣導之以自欺欺人故招致王中正輩為此荒唐詭異之說似巧而實拙也

盜遇火成金謂中正曰當授以法從及歷陽始得之且俾辨草木藥品而授以小環神劍及密緘之書戒以勿泄中正亟欲獻於上為有司所抑還至上饒佯狂黥竄嶺外未幾逋匿京城樞密承旨謝德權常為嶺南官知中正化銀術為奏因得脫軍籍內臣劉承規又以其名聞初名捷為更曰中正賜對特授許州叅軍承規於皇城公廨居之凡入市必有人與之語承規詰之不能隱曰即授法者也承規為新堂以祈靈景德四年五月十三日遂降於堂紗幘閒服青衣

因原、作自

抑原、作欲

按此等邪說宜著書明道者所不錄然公典史事此為進御之書以當世深諱之事不敢斥削惟後段中舍隱刺而似涉揄揚倘不善讀者及藉口蠱惑矣

具冠劍自是屢降惟中正喻其旨或其侍童偶語始知乃司命真君也明年天書降改元大中祥符東封畢加真君號曰九天司命天尊五年天尊臨降宮廷上號曰聖祖即改皇城新堂曰元符觀承規私第曰東宅所賜中正通濟坊第曰南宅竝為聖祖降憇之所中正累遷加致仕積官至右神武大將軍唐州團練使大中祥符九年中正被疾見聖祖謂之曰慎密類汝者少即塑形景靈宮為吾輔勿憂也卒年五十五其妻施氏封吳郡夫人諸子皆授殿直中正初得

神術雖貧苦不以勢利趨告於人及享祿賜所化黃
白惟施貧奉道釋而已朝廷舉大禮及營繕必達靈
命以藥金銀爲獻中正復自以所成者助經費上爲
制靈遇贊紀其事云

劉云王中正乃術士也何緣入于武臣當附于三卷祠祭內與
劉守真同載必誤入此按傳敘官至大將軍則附武臣非誤

石普其先幽州人後徙居太原父通給事晉邸普方
十歲亦畱邸中以信謹見親太平興國中補寄班祇
候遷供奉官屢以戰功擢至西河節度使知許州大
中祥符中上言九月下旬日食者三又言商賈自秦
州來言喚厮羅欲酬殺曹瑋請以普所獻陣圖付瑋

當決必勝帝謂普妄言樞密使王欽若因言普以邊
事動朝廷帝怒命侍御史知雜呂夷簡劾之獄具集
百官叅驗九月下旬日不食普引伏私藏天文法當
死官節度使當議貴除名貶賀州改率府副率房州
安置後稍復至右武衛大將軍卒年七十五子仲卿
仲武仲舒仲文普有膽略聞敵所在卽馳赴親冒矢
石前後戰未常少却通兵書及陰陽六甲星曆推步
之術太宗常令善工製金帶普帶御器械輒面求解
以賜之後雖謫廢當太宗忌日必舉族詣佛寺齋薦

歲以爲常淳化中督兵捕永興賊邢橐馳賈禿指百
 人至則擒之李順之亂爲西川行營先鋒與韓守英
 馬知節合擊遂斬順因馳驛面陳蜀亂之由賦斂急
 迫請一切蠲其租賦太宗許之即日還蜀揭榜宣諭
 莫不感悅咸平二年軍盜王均據益州叛又命爲川
 峽路招安巡檢使雷有終攻城均走普追躡至富順
 監敗之均自殺獲首以獻餘黨悉平明年契丹寇邊
 普爲保州鈐轄北面行營管神策先鋒殺虜騎於炎
 涼城又敗之於長城爲莫州總管建言軍中號令遣

人馳告慮爲奸詐所誤真宗爲制傳令牌原○詔作御案又獻禦戎
 圖掘塹設險以陷胡馬景德初王繼忠爲契丹請和
 以書遺普普爲達於上其後因請罷天下醮設歲可
 省緡錢七十餘萬貫以贍國用遂忤上意

曹克明其先太原人祖爲雅州刺史因居百丈縣夷
 賊攻百丈父遠遇害克明尚幼有妾匿之葦薄中得
 脫旣長喜兵法善騎射從父光實領夏州都巡檢破
 李繼遷繼遷僞降設伏光實赴而歿於葭蘆州克明爲衙
 內虞候從行祕不發哀使人傳光實命回兵銀州乃

與其僕潛入虜中獲光實屍還葬京師蜀人於法不許還其鄉克明以母老趨道以歸淳化五年李順反購克明欲用之乃攜老母遁山谷間及賊陷雅州克明乃集潰兵得七千人又募丁壯三千遂復名山火井夾江等九縣立七寨於嘉眉邛州界分兵以邀擊賊因復雅州太宗令總管王繼恩齎敕獎諭擢西頭供奉官監兵黎州以餘賊未寧徙權雅州駐泊巡檢至道元年峽路潰兵鄧紹等攻雅州克明又討平之積官至西上閣門使知鼎州卒年七十二子元賓元

舉景德中溪峒蠻入寇以克明知邕州遺書三十六峒酋長諭以朝廷恩信悉來赴承天節會遺以篋衣咸感泣而去獨洪峒恃險不至克明說左右兩江防遏使黃仲盈領兵攻之斬其首領梟首於市旣而宜州澄海軍校陳進反會鬱江暴漲州城摧克明伐木造舟爲虛城水上以備守禦仍募溪峒兵趨象州賊遂南去巡撫使曹利用召克明會兵至貴州遇賊斬首四百餘級利用專其功克明亦不自言徙都大提舉江淮兩浙捉賊獲賊必釋其罪予以私錢使返捕

索其黨。所獲千餘人。知江寧府張詠以其事聞。賜錢四十萬。撫水州蠻叛。以克明爲宜容等十州巡撫使。兼安撫。蠻首乞招安。不許。與中人楊守珍領兵深入。蠻多伏弩窮谷閒。而磴道險絕。克明意士卒有退志。命後軍伐大木絕歸路。克明踰月纔至撫水州。知州蒙承貴等出降。克明謂曰。汝三十年爲邊患。止謂官軍不能至耳。天子好生。不欲絕汝類。姑許自新。皆伏拜感激泣。命飲血爲誓。勒銘奴山而還。於是蠻人願內徙者七百餘人。散之湖南諸州。居焉。奏請改撫水

州曰安化州。分以爲上中下三州。皆蒙氏爲守。有區廖潘吳四姓居沿龍江。捕魚射生。其田有水田。其產牛馬豕彘。其植麻苧桑柘。其兵器木弩標槍環刀藥箭。傍牌。其語惟懷遠人能釋之。克明初至。蠻酋獻藥一器。曰溪峒藥。箭中人可以此解。克明曰。何以驗之。曰。請試以雞犬。克明曰。當試以人。乃用箭刺脅。股飲之。藥而死。羣蠻股慄。安化旣平。徙知桂州。始置溪峒司。而兼領之。又奏以廣南兩路土軍。竝爲忠敢。嶺外民居結茆而已。雖嚴火禁。不能弭患。克明激水以入。

城○夾○道○分○流○以○為○之○備○又○命○北○軍○教○以○陶○埴○民○始○為○
瓦○舍○自○是○其○患○遂○平○

此傳錯綜軼宕極有生色
原本被訛破偽作為末平字作罕

李繼宣開封人乾德中以材武補殿直年纔十七命
捕虎峽州凡殺二十餘生擒二虎一豹以獻遂授以
邊任所至有戰功常追北虜於新城斬其賀恩相公
監兵高陽率兵入虜境燒聚落獲生口以歸時虜方
寇瀛鎮聞之遂引還初繼宣承受定州路奏事已
嘗入北境殺獲甚衆又從崔彥進曹彬李繼隆米信
田重進與契丹戰未常不捷至是虜畏之惟任鎮州

鈴轄而主帥傅潛怯懦有警請行皆為所抑及與高
瓊同主軍事遂逐虜衆越界河嘗與秦翰楊嗣楊延
昭張斌遇賊於威虜軍臨陣馬中矢凡三易之嗣輩
皆引去獨繼宣整所部接戰薄暮至營所詔稱獎之
積官至四方館使康州刺史卒年六十四

原本延昭上脫楊字

荆嗣河南人少應募為控鶴卒乾德中李繼勳討河
東擇勇敢百人開道擣洛陽寨嗣請行斬五十餘級
賊遁河汾驍楊鄴退保城嗣與衆進焚南門奪其羊馬
城賊夜薄寨繼選五百人嗣為其冠及旦斬馘殆盡

太宗親征巡師嗣登城手刃數賊股貫雙箭又中手
礮折二齒太宗亟召賜袍帶常從崔翰征幽州從袁
繼忠田欽祚戍三义口從田重進譚延美討賊於飛
狐口戰無不克賊嘗夜圍重進寨重進問計於嗣嗣
曰所領不過五百人彼衆踰二萬計請閒道見延美
延美曰賊勢如何可解也嗣曰願得數百人延美與
之卽依山布陣以三百人執白旗於道隅獨率所部
趨虜虜見其疾馳而旗幟稍盛疑大軍至遂遁去嗣
之用兵凡一百五十餘戰未嘗無功亦未常自伐也

積官至虢州防禦使卒垂涕謂其子曰累世爲將者
其後不昌汝輩惟益修謹乃免於患子信仁貴

擣原作捷

隆平集第十九卷

宋曾文定公編撰

南豐後學彭期訂

校

武臣

楊嗣殷前指揮使信之子以父任爲殿直數有戰功累擢至澧州團練使以左龍武軍大將軍致仕卒年八十一子承憲淳化二年嗣知保州有詔褒其治狀咸平三年敗契丹之衆於廉良除保州刺史名見特授團練使嗣言久與楊延昭聯事臣不逮延昭一旦

驟居其上。臣所未安。願仍舊。真宗嘉其廉退。竝命為團練使。令嗣因持延昭誥與之。

原本臣所臣字作言因

李溥始為三司小吏。太宗論及財賦。必召以問利害。頗納用之。擢為左侍禁。自是進至宮苑使。團練使。兩以賊貶。責授右千牛衛將軍。致仕。卒。年八十四。子居簡。文仲。景德二年。以溥制置江淮等路鹽茶礬稅。兼發運使。江淮米運至京。舊止二百五十萬。至溥。遂增至六百餘萬石。擢為發運副使。高郵軍新開湖。風濤多覆舟。溥課官舟還。及泗州者。載石積湖中。成兩狹。

岸。其患遂絕。正除發運使。既又進為修玉清昭應宮都監。溥既久。頗利權。內侍丁謂為之助。又林特為其姻家。故賊汚不法。以及於罪。

原本論及及字作其增至作增置

盧鑑。字正臣。金陵人。淳化四年。舉進士。不中。授三班奉職。積官至西上閣門使。知秦州。卒。年七十。子咸盛。

疑脫為字

初。鑑郵延路走馬。承受。就除本路駐泊都監。屢擊走。繼遷。焚族帳。積聚。而獲其畜產。以數萬計。繼遷聲言。石隕帳前。有文曰。天戒汝勿為中國患。因入奏曰。賊偽為此。以給朝廷。宜益設備。後果陷靈州。鑑知儀州。

謀者言繼遷將由制勝關入寇。詔徙老幼芻粟於內地。鑑奏以爲搖民心。且民弱不可徙。已而賊亦不至。周美字之純。靈州人。嚮棄其族。閒行詣京師。隸軍籍。從駕幸澶淵。自陳願假三數騎。係契丹首領獻闕下。真宗壯之。特旨令入宿衛。累以戰功。遷天武都虞候。監兵延州。元昊破金明。美請於安撫使范仲淹曰。金明地當邊衝。不可不早完之。仲淹因屬美董其役。旣而元昊兵數萬。陣於延州城北。美領衆二千。決戰會屯山北。多設疑兵。賊以爲救至。引去。復攻艾蒿寨。又

夜出戰。多設炬。張旗幟山上。賊棄鎧甲牛馬而遁。遂募工築萬安城而還。龐籍畱之。改東路都巡檢使。又敗賊於金陽城。明年。昊賊據永平寨。諸將會議。种世衡欲直擣賊。美以爲賊料吾來。必設伏。不如閒道出其不意。世衡不從。果無功。而美趨芙蓉谷。大破之。復擊賊於野家店。逐北至拓拔谷。還屯永平寨。勸士卒墾田。歲收六千斛。築柵蔥梅官道谷。以搯賊路。徙鄜延路都監。破賊於無定河。乘勝焚金州廬帳。殺首領。獲牛羊兵械甚多。城龍口平寨賊精兵數千來襲。美

以百騎破其衆。累擢至觀察使、馬步軍副都指揮使。卒年七十六。贈節度使。諡忠毅。自陝西用兵，宿將數不利。獨美前後十數戰，皆有功。焚寨復城堡四十二。招種落內附十一族。所得俸賜悉分士卒。子利涉、永

清、永正。

原陷上無城字

旨作常精兵上賊作以

按咸平五年趙保吉陷靈州景德元年幸瀟湘則陷字上應有城字

焦守節，字秉節，以父彰武軍節度使繼勳遺奏補殿直。累擢至四方館使、榮州刺史。以右神武大將軍致仕。卒年七十六。子宗說、宗簡、宗慶、宗彝、宗諒、宗信。初，高溪州蠻寇邊，命守節往議攻取計，以爲山川阻險，

非大軍之利，遂招撫之。三司常奏守節監香藥樵易院歲課增八十萬，遷閭門副使。真宗謂宰相曰：「以財利羨餘遷橫行，何以勸邊陲効命者？」止命。以宮苑副使兼通事舍人，常使契丹館伴。丁求說頗易之，指遠山曰：「此黃龍塘也。」應聲問曰：「燕然山距此幾許？」求說慙，乃加禮焉。黃龍塘，卽德光置晉少帝之所。新編塘作府閻守恭，并州人。繼元敗，徙其民於大名府，因家焉。少負販，并汾間聞郭進，被人主優遇，慨然曰：「使進不遇，亦一行伍耳。吾顧不能逮邪？」乃應募隸拱聖軍，累以

戰功擢德州刺史并代路鈐轄卒年七十五子繼恩守恭既仕宦見士大夫必訪郭進平日所行以爲法其慕之如此故馭軍嚴飭所得俸賜悉以散施雖居家如對賓客

原本思作思所行作所存

張綸字公信棣州人淳化中舉進士不中補奉職累擢至乾州刺史知穎州卒年七十五子孝先紹先辰州溪峒蠻寇邊以綸知辰州築蓬山驛路賊不得通方遁去又修新興寨天禧五年爲江淮發運使增米八十萬復置監場於杭秀海州增歲課百五十萬疏

五渠導太湖入於海復租米六十萬開長蘆西河以避覆舟之患築高郵北漕河隄二百里旁錮以巨石爲十閘以泄橫流又修復泰州捍海堰因命兼權知泰州堰城復逋戶三千六百州民爲立生祠

安俊字智周其先太原人以儒家子得給事資善堂仁宗卽位補殿直累擢至步軍都虞候陵州防禦使卒年六十四贈觀察使子介愈弁合俊歷邊任有威名戰功家藏書數千卷婚姻多擇士人常曰吾家集坐有文士過半平生足矣

王信字公亮太原人初應募潞州軍籍常生擒七十賊以功補龍衛指揮使遷都虞候劉平石元孫三川之敗信獨以所部兵獲數千級知保安軍以二千兵破西賊數萬衆爲高陽副都總管明鎬奏充恩州四面都總管賊黨三百餘人鼓噪而出信悉捕戮之擢留後召爲步軍副都指揮使卒年六十一子繼恩信持重。用兵未常沮劔

原本破西上有級字賊黨上有破字

劉平字士衡開封人景德三年登進士第真宗愛其才將用之爲丁謂所惡以爲平將家子可委以邊事

仁宗卽位章獻太后思謂言乃自侍御史換以衣庫使累擢至步軍都指揮使靜康軍留後鄜延路副都總管兼鄜延環慶兩路同安撫使又兼管涇原路兵馬餘見石元孫傳

石元孫字善長中書令守信之孫父保興官防禦使元孫以守信恩補供奉官累擢至邕州觀察使鄜延路副都總管兼安撫使寶元初元昊發兵攻保安軍自土門路入寇知延州范雍書召劉平元孫合軍趨土門旣又有告賊兵數萬趨金明圍延州雍復召二

帥還軍救延州。平督騎兵先發，步卒繼進。夜至三川口西十里營，令騎兵先趨延州奪門，詰朝步兵未至。元孫與平還逆之行二十里，遇步兵及鄜延駐泊都監內臣黃德和、碎金谷巡檢万俟政、郭遵所將兵皆至。步騎萬餘結陣東行，至三川口遇賊。是日官軍殺賊鐵騎六七百人，及蔽盾爲陣者八九百人。平左耳右脛皆中流矢，薄暮賊復以輕兵來戰，官軍少卻。黃德和居陣後，遂走保南山，追之不止。遣軍校以劍遮士卒，得千餘人，轉鬪三日，夜衆寡不敵，遂皆被執。平

不復食，仍數罵賊，遂遇害。年六十八。元孫不死，及元昊納款，乃得歸。德和旣遁，輒誣平及元孫降賊，朝廷以禁卒圍其家，命殿中侍御史文彥博、內臣梁致械詣河中府置獄，遣知同州待制龐籍往訊焉。具得其狀，延州吏民亦詣闕訴平等實戰歿，遂釋二家。惟戮德和、梟首延州城下，賜平家信陵坊第一區，贈平節度使、平妻南陽郡夫人、子慶孫、宜孫、昌孫、貽孫、孝孫、季孫及三弟、四孫咸贈賜官，謂元孫已死，亦贈節度使。子孫贈秩賜官者八人，及歸言者，請誅其辱國之

罪上特貸之、安置全州、還卒、年七十二、子宗道、宗易、宗尹、宗亮、宗廣、宗求、平剛直、任俠、善弓馬、初知果州、南充縣、以父喪解官、還任安州、道中遇賊十數、以刃臨之、平引弓三矢斃三人、餘遂遁去、其帥鄜延、初上攻守之策、不爲不知邊事、特志常輕賊、而自處以必勝、又衆因德和而潰、遂至陷歿、聞者傷之、

原本及作友

王珪、開封人、初應募爲親從官、累以戰功擢至禮賓副使、涇州駐泊都監、餘并耿桑事、見任福傳、耿傅、字公弼、祖昭化、以不屈於賊而死、傅以蔭補累

官將作監丞、知河南府、永寧州、知州、宋綬薦其才、除通判儀州、徙慶州、

知州原作知府

桑澤、雍丘人、舉進士、不中、移居汝穎間、諸縣多盜、自請補者老、殺獲殆盡、其鄰因之無盜、京西轉運使表其事、授郊縣尉、徙澠池、而朝廷特改右班殿直、積官內殿崇班、涇原路兵馬都監、

任福、開封人、初補御士、由諸班遷至刺史、始擢邊任、以功遷至賀州防禦使、知慶州、兼環慶路都副總管、慶曆元年、詔福往涇原路計議邊事、適安撫使韓琦

行邊趨涇原聞元昊闕兵折薑會謀入寇遂以兵萬八千人命福統諸將擊賊以耿傳參軍事桑懌爲先鋒王珪及涇原都監禮賓副使武英各以所部兵從福節制琦面授福及諸將方略俾併兵合勢自懷遠城趨德勝寨至羊牧隆城出賊之後諸寨相距僅四十里道近且易照應糧草足供如未可戰則據險設伏待其歸然後邀擊之福等就道琦又至城外重戒之福自新壕引輕騎數千趨懷遠城撩龍川遇鎮戎軍都同巡檢常鼎劉肅與賊戰於張家堡斬首數百

級賊僞北桑懌以爲然遂引騎趨之福亦踵其後會合軍屯好水川朱觀武英耿傳屯籠絡川相距五里諜者言賊兵少故福等輕之追奔三日芻糧不繼人馬饑乏至籠竿城北遇賊距羊牧隆城五里結陣以抗官軍諸將見其兵勢之衆方知墮賊計中勢不可留遂前接戰桑懌劉肅先戰歿福繼之珪及武英而下皆陷焉獨朱觀保民垣四向縱射會暮獲免自主將參軍至偏裨死者十數軍校又數倍之士卒踰六千人福等貪功輕敵不能稟韓琦併兵合勢之言以

至覆敗。奏至上，甚悼之。贈福節度使，兼侍中。賜第一區三子一姪一孫，贈秩。咸賜官。王珪贈觀察使，三子賜官。耿傳贈右諫議大夫，五子賜官。三人為京秩。桑懌贈防禦使，子湜推恩加等。其餘褒贈有差。福之子曰懷德，懷譽，懷謹，姪懷玉，孫惟恭。珪之子曰光祖，光世，光嗣。傳之子曰瓊，瓌，璋，珪，琬。康定初，元昊寇鎮戎軍，珪將三千騎為先鋒，自瓦亭至師子堡，賊圍之數重。珪奮擊，多獲首級，乘閒叩鎮戎軍，請益兵，不許。止。繼糧與之，士卒既飽，珪語之曰：兵法以寡擊衆，必在

暮○我○兵○少○乘○其○暮○氣○之○衰○可○得○志○也○乃○馳○入○賊○一○將

劉○云○敘○事○如○此○才○不○減○左○氏

以○鎗○直○其○胸○傷○右○臂○珪○左○手○以○杵○碎○其○腦○一○將○復○以○鎗○進○珪○挾○其○鎗○運○鐵○鞭○擊○死○之○虜○驚○遂○引○去○上○聞○特

遣使獎諭以其下死傷多止賜名馬金絹仍暴其功以勵諸將珪以所得二鎗植山上及珪死邊人即其所為立廟焉珪通陰陽術數好水之戰自知其不得還將行謂其家人曰可速去無為虜所仇也及虜攻瓦亭果購其家人屬如珪之言珪所將兵止五千連鬪三日諸將俱歿珪望福陷賊猶欲援出之軍校顧

望多不從。珪斬以徇，乃復入戰，擊殺數百人，鐵鞭撓曲，手掌破裂，三易馬，猶馳擊數百人，矢中目，還軍中卒。武英常勸耿傳曰：君非主兵者，柰何欲與英俱死也？朱觀亦戒傳少避銳鋒，傳不答。於軍中指顧自若，求與英俱死。或謂福之敗，由傳督諸將稍急，韓琦得傳為朱觀貽書戒以持重，尹洙亦作閔忠辨誣二篇，其謗遂息。懌善用劍及鐵簡，有智略，謹畏常若不足。所至寇盜衆所不能獲者，必獲之。其功賞推之，居已上者，或譏其好名，歎曰：若欲避名，皆不可為也。益自

信。

原本涇原作涇州珪上脫王字當訛崇劉訛列推恩訛惟思三千上有以字先鋒上有策字顧訛領

葛懷敏，開封人，感德軍節度使霸之子，以霸蔭補供奉官，其妻王德用之妹也。懷敏通時事，善希合，故多薦其才者，積官眉州防禦使、涇原副都總管。慶曆二年元昊寇鎮戎軍，懷敏領養馬城會將，聞賊兵徙壕外，遂帥諸將趨定州，劉賀以蕃兵五千與賊戰，不勝而潰。懷敏入保定川寨，曹英又敗於寨之東北隅。懷敏所部人奔駭，懷敏為衆所擁，幾蹂踐死，輿至甕城，乃蘇。賊遂聚火圍其城，懷敏召諸將謀來日結陣赴

鎮戎軍因諭其親軍聽中軍鼓乃得行及鳴鼓懷敏上馬大軍未動馭者勸未可去有頃復上馬又不從拔劍將擊之士衆遂散乃策馬至長城壕賊周圍斷其歸路與諸將皆遇害餘兵爲賊所隔及保他寨堡不赴者獲存賊遂長驅直抵渭州六七百里民受其患初懷敏除鄜延而主帥范仲淹言其怯懦不知兵遂徙涇原卒敗事如仲淹言定川奏至贈懷敏節度使諡忠隱子宗晟宗壽宗禮宗師皆贈秩或賜官策原作東郭恩開封人初隸諸班出爲左侍禁累有戰功積官

崇儀使并代鈐轄管句麟府軍馬事初夏人歲侵屈野河地至耕穫時輒屯兵河西以誘官軍經略使龐籍戒邊將勿與戰月餘食盡去如是屢矣是歲正月出屯三月始去并州通判司馬光行邊至河西白草平數十里無虜跡時知麟府州武戡通判夏倚已築一堡又與光議乘虜之去出其不意別創二堡據其地使不得耕功畢則廢橫戎臨塞二堡徙兵實新堡列烽燧自衙門紅樓下視其地如指掌堡成三十里外田虜必不敢耕矣籍從光議遂築二堡恩與武戡

及走馬承受內臣黃道元以巡邊為名往按視之謀者言虜兵屯沙黍浪十五里不絕恩欲止道元怒以言逼恩恩遂夜率步騎千四百人循屈野河北行見臥牛峯舉火戡曰虜知吾輩出矣道元曰此若輩之為也俄聞鼓聲亦不信比明遇賊自旦戰及食時虜四面合擊武戡走東山趨城東掖門以入恩與道元皆陷賊恩死之贈觀察使子中言中彥中良中謹弟思竝贈秩或賜官給恩舊俸三年

原本
脫武戡字掖新編作挾

走字上

馬遂開封人初補散職為北京指揮使聞王則叛中

夜叱咤晨興詣留守賈昌朝請與行陣命持榜招降則盛服見之與坐遂諭以禍福則不答遂扼其喉擊之流血賊徒驍捷卒石慶斷其一臂遂詬之曰妖賊吾恨不斬汝萬段即被害時張得一侍賊側上聞遂死深嗟惜之贈遂宮苑使五子竝賜官得石慶付其子使剖心祭遂

原本扼訛振深作而

為其親對賊不難

景泰字周臣普州人天禧三年登進士第累官至都官員外郎知成州元昊反有薦泰知兵召到換左藏庫使知寧州泰通判慶州日常上章言元昊包藏禍

心主將任福無長策。凡三上不報。及元昊寇鎮戎軍。敗葛懷敏。初入攻渭州。秦率兵五千。閒道赴援。戮先鋒殿直張向。逗遛而行。遇賊於彭陽西。依山爲陣。陰原作彭城而從新編選三百騎爲左右翼。張旗幟爲疑兵。賊愕視不敢進。而遁。士卒請追擊。秦止之。搜山果得伏兵。與戰。斬首千餘級。以功遷西上閤門使。久之。加忠州刺史。秦鳳路都總管。卒年五十八。子思問。思安。思忠。思立。思誼。趙滋。字子漢。開封人。以父戰死。補奉職。累擢至端州防禦使。步軍都虞侯。卒年五十七。滋常爲涇原儀渭

州巡檢。得勝寨主姚貴。殺監押崔詢。劫宣武神威騎卒千數。叛攻羊牧隆城。滋領兵至。餘人降。獨貴走出寨。招討使命滋給賜。降者及遷補將吏。滋曰。是誘其亂也。藏其檄不下。招討使怒之。功遂不及賞。范仲淹韓琦舉滋可將領。滋在京東。數獲盜。不自言。知青州富弼言於上。獲蠟等遷官。管句河東經略司公事。建言代州寧化軍有地萬頃。可募種田。作教以戰射。令護塞。從之。其利甚博。契丹人數乘小舟漁界河者。吏莫敢禁。更造大舟十數。運鹽海口。滋捕殺之。移文涿

州遂不復至。後因虜使言朝廷乃擢使管軍故事邊州米出外界不許過三斗。滋知雄州契丹大饑。滋曰彼亦民也。米出無所禁。滋剛果有才。特矜傲。自譽人多。謂之。

原本威作城莫敢上空一字

李緯字仲文。以父廣東提點刑獄遺恩。補借職。累擢至西上閤門使。卒年七十。贈引進使。陵州團練使。子師中。積中。純中。緯常知渭州。請修籠竿城。瓦亭寨。及以籠竿爲德順軍。范仲淹韓琦遂舉緯知德順軍。招蕃部內屬者數百帳。葛懷敏旣陷。歿元昊因攻瓦亭。

籠竿皆不能下。雄州未有常平倉。緯知州以賜公使錢置焉。及民饑。遂獲均濟。

范恪字許國。開封人。隸軍籍。選行門。歷龍旗直散員。押班。試換內殿崇班。積官至兩使。畱後。卒年五十。贈節度使。子愈。愿。總。愬。恕。愚。應。隱。懿。億。恪。驍。勇。善射。臨敵敢前。初爲慶州北路都巡檢。預攻破白豹城。兵還。賊襲其後。恪設伏擊之。殺獲甚衆。常會諸道兵攻十二盤。暨咄咄當。述子寨。中流矢。神色自若。至暮以言激衆士卒爭奮。遂得其城。有弓勝二石。一斗。其箭鏃如

鏃臨陣必中間有一矢貫二人者虜畏之從奪蕉蒿
寨歸恪殿後虜以數千騎來襲恪止有二鏃箭引滿
不發賊欲相及輒復避去終莫能近

原本間作聞奪訛奮

張亢字公壽濮州人天禧二年登進士第以通判鎮
戎軍常上言元昊喜誅殺勢必難制宜為邊備又論
西北攻守繼而契丹聚兵幽涿間遂擢如京使知安
肅軍因入奏言虜主孱而歲歎方藉金帛之賜特懼
中國見伐而為此耳卒不敢動如亢言自是數歷西
北邊任積官至客省使眉州防禦使徐州總管卒年

六十三子杰黯焄烈儻寶元閒夏賊破豐州圍府州
及解去屯瑠璃堡縱游騎擾邊鄜府閉壘二年矣亢

管句

受命為并代都鈐轄麟府軍馬事至城下示以救始

開關亢入命不復閉縱民庶出入時雖有禁卒數千

皆畏怯無鬪志亢乃募役卒取敢戰者得數百人使

擊賊有以首級獻者必厚賞之禁卒慙始請効死亢

度其可用遂命擊瑠璃堡而破之士氣益振明年詔

遣中使督亢護麟府郊賞物錢賊鈔略不得乃悉衆

邀其歸路亢以三千敗賊數萬衆既而亢築建寧寨

度賊必至。虎翼軍驍勇，賊人所畏。而萬勝軍疲怯，敵常易之。故更去兩軍旗幟，賊果出爭，亟趨萬勝而先犯之。不知乃虎翼也。虜大潰，斬首二千餘級，不敢復出。未踰月，築成清塞百勝中候，建寧鎮川五堡。而麟府之路始通。亢復奏以所通特一徑，請更增竝邊諸柵。以安河外。議未下。徙知瀛州。復除并代副總管。御史梁堅劾亢以庫金於成都市易奪官，降為鈐轄。夏人與北虜戰河外，乃復副總管。知代州。范仲淹宣撫河東，因奏使亢就總前議，增築諸柵。事經略使明鎬

移文止之。亢○謀○而○能○成○舉○動○亦○不○猶○人○不聽。不閱時，諸寨成。遂自劾違鎬節制。朝廷不問。蕃漢歸者數千戶。歲減戍卒萬人。徙知瀛州。言城小而人衆，請廣其東南關為緩急備。安撫使夏竦惡其在陝西不附已，遂沮止。其後卒城之。如亢議徙渭州。陝西轉運使奏亢擅減三司郊賞物估值。會竦入為樞密使，遂奪亢防禦使。御史宋禧又以市易事言奪引進使。久之，陝西轉運使言亢市易非自入。始還將作監。復防禦使。遷客省使。知環州。坐與鄰守會境上。經夕降曹州鈐轄。亢輕財好施，不拘小節。

宴賞過侈。雖市易猶不能給。然軍政嚴整。所至有風力。蕃漢多圖其像。瞻祀之。仁宗常語侍臣曰。夏人陷豐州。麟府之間。震擾。亢築堡寨。以護民耕收。築城以包水泉。又增大高陽城。使民有以自保。民思愛之。不忘。宜特贈亢遂州觀察使。原本誅作謀難作枉及作方有以作首以怯下敵字作所犯之下脫不字五堡作百寨復作得

种世衡字仲平。放兄元子也。以放蔭授將作監主簿。累遷太子中舍。通判鄜州。建言築青澗城。其左可致河東粟。其右可捍延安。其北可圖銀夏。詔從其議。特換內殿崇班。知城事。積官東染院使。環慶路鈐轄。卒。

年六十一。子詒。諛。詠。諮。諤。記。訢。誼。世衡在青澗城。開營田二千頃。又募商賈。貸以緡錢。使通貨。賄人爭歸焉。城初無水。穿井百五十尺。至石。乃曰。能屑石一畚者。酬百錢。居數日。及泉。民甚賴之。知環州蕃部有牛家族。奴訛者。崛疆不出。見郡官。聞世衡至。郡郊迎。約詰朝往勞其族。晨興。雪三尺。左右曰。地險不可行。世衡曰。信不可失。比至。奴訛大驚。率其族拜馬前。因請內屬。凡邊民有過。則使之射。四發二中者。釋其罪。兩辭疑而不決者。亦因射中否。而與決之。境內之人。因

示○信○角○射○自是○大將方略○

多善射者臨邊數年積穀通貨撫養士卒能得死力
 在環慶病告中得范仲淹檄與蔣偕同築細腰城力
 疾奔命城成而卒羗酋相率朝夕臨之仍圖其像永
 以瞻慕

原本兄元作元兄不出作未出

劉滬字子濬保州人父文質任連州刺史子十六人
 渙滬有聞滬以父任為奉職積官內殿崇班知水洛
 城卒年四十八滬頗習書傳有智略韓琦范仲淹薦
 其才武擢閤門祗候常為瓦亭寨監押權靜邊寨又
 破穆寧生氏西南去略陽二百里中有城曰水洛川

原平下多地字

平土沃有水輪銀銅之利環城族帳多聚漢民之逋
 逃者曹瑋在秦州常經營久之未能得滬密使說其
 城主鐸厮那令內附會四路招討使鄭戩行邊滬遂
 召鐸厮那及戎落尊屬來獻結公水洛露羅甘地乞
 冠帶為屬戶戩許之因令滬以兵往受地既而氏情
 中變滬淡入無援獨以千人擊潰氏兵數萬其酋請
 服因盡驅隸麾下通秦渭路涇原帥尹洙檄令罷役
 不從益增版趣役召之屢亦不至洙令狄青械滬及
 董士廉付獄戩雖已罷四路而論奏不已朝廷遣魚

周詢程戡相視。乃復以滬訖役。而任以城事。城既成。猶坐違帥臣命。降一官。首發瘍卒。水洛居人畱葬。而立廟。城隅歲時祀之。有碑紀其事。今存焉。朝廷從蕃官等請。嘗命其弟淳為水洛城兵馬監押。原本璋訛韓泰訛泰版趣訛板趨張君平字士衡。磁州人。以父戰歿。補三班差使。黔州指揮使。獠寇邊。君平領兵。設伏奪寨。斬首百餘級。遷三班奉職。為施州監押。積官至作坊使。卒。子造。遜。達。君平有幹才。明水利。朝廷議河事。必訪之。守官汴口。建言。請審擇口地。歲省役渠工百餘萬。雖役不歲興。

而可免堙塞之患。又請沿此法甚善古今通行河。令佐植榆柳萬株者。書為課。又請以時疏導。宋陳宿。亳。蔡。穎。單。滑。州。溝。洫。與畿內相接者。以免水患。令州縣官吏兼管。句溝洫河道。言皆施行。原本脫獠字可免訛作不免

孟元字善長。洛州人。少隸禁兵。以挽彊補殿侍。累擢至眉州防禦使。卒年六十。贈觀察使。子防。隨。王則據貝州叛。元為真定府路鈐轄。領兵攻討。被數十鎗。又中飛石。墜壕中。既出。益銳。更募敢死士。由永濟渠穴地。以進賊平。進右驥驥使。御史中丞郭勸言賞未當。

功擢普州刺史知滄州其民以鹽爲生歲歉商賈不行元度軍食之餘以穀易鹽民賴以濟元雖出行伍好讀書流輩鮮及

馬懷德字得之開封人父玉東頭供奉官常自言懷德可試武藝補奉職累擢至步軍副都指揮使留後卒年五十六景祐二年懷德爲延州東路巡檢數以少擊衆徙青澗城監押入賊境焚二寨親射殺其酋狗兒廂主又率蕃漢兵焚蕩賊海滿申州茶山五十寨三百餘帳斬馘百餘級奪獲畜產萬計用范仲淹

韓琦舉爲閭門祗候知延州龐籍奏爲東路巡檢使殄黑神厥堡等大寨又以兵數千敗賊四萬騎於僕射谷徙鄜延路東巡檢都監破賊青化押班吃當三寨殺擄其人物甚衆元昊納款與國子博士高良夫會西人畫地是時用兵之久人民流散懷德招輯有方經略使梁適奏請推其法諸路詔從之

原本奏下脫爲字是訛作果

許懷德字師古開封人以父任爲東西班殿侍累擢至寧遠軍節度使又歷保寧建雄兩鎮殿前都指揮使卒年八十四贈侍中謚榮毅子士平士宗士端士

寧士勤士臻士演士先士溫初懷德爲鄜延路副總管賊以三萬騎圍永平寨止率勁兵千餘人突圍破之賊有出陣前據鞍慢罵者懷德引弓射之應弦而斃未幾賊攻延州懷德領兵閒道出其不意左右奮擊賊遂解去其後以不赴援而失賊及理財產三被降徙慶曆閒遂入總禁旅典司宿衛凡十四年以老乞身上未之許後復自言恐爲御史所彈不得善罷上特詔有司爲減歲數懷德雖老習軍旅之事然戰功所可見者一二而故事節度使移鎮加恩皆再表

辭翰林學士歐陽修以爲慢朝廷詔以修章示懷德雖悚息謝罪而終亦不復別進表上亦不加責

原本勁作勤有出有字訛隨失作入典訛曲

隆平集第二十卷

宋曾文定公編撰

南豐後學彭期訂

夷狄

契丹耶律隆緒年十二嗣其父明記位明記偽號景宗初名述律德光之子也唐初契丹八十餘年未常寇邊通天時李盡忠始陷營州明年總管楊元基以奚軍攻潰其衆至開元十一年可突于奉盡忠之弟邵固統衆詔許襲王方是之時猶稟命中國如此梁

正明閒耶律阿保機始建元神策遂以五十萬衆從
晉叛將盧文進寇幽州龍德初復入爲鎮州張文禮
之援明年晉王大破之於新城而獲阿保機之子自
是繼爲邊患及阿保機死子德光繼立晉祖因其兵
勢而得天下故兼臣禮而父事之割地以爲壽輪帛
以爲貢未更一紀之久已貽開運之禍其後劉崇崛
疆於太原爲計亦出於此有以益其驕僭也德光滅
晉而歸死於鎮陽之殺狐林其兄之子永康王兀欲
自立爲天授皇帝囚其祖母述律氏於木葉山述律

敘事中兼以議論行之何等活潑

氏阿保機之妻也兀欲五年爲其族述軋所殺述律
討其亂因自立爲天順皇帝更名謂之明記太平興
國未明記死其妻專國事雍熙閒曹彬北伐失利於
岐溝隆緒數內寇者謀皆出於母氏也咸平二年舉
國而來范廷召大破其衆斬首萬餘級雖遁而未懲
故景德初復大舉戎馬及於澶魏之郊真宗大駕再
莅河朔甫次衛南而虜之謀將撻覽已斃於我師之
強弩謀窮勢蹙始因王繼忠之表請修好息兵天聖
未隆緒死宗真立宗真隆緒之第八子也母曰順聖

措語間要而有分寸

元妃隆緒遺命以正室齊天皇后太后爲元妃蕭氏爲太妃太妃殺齊天而自立爲太后多殺戮功臣而專用其兄弟御宗真甚嚴宗真不能堪景祐初遂率兵逐其母使守隆緒塚其國人有勸迎其母以覬朝廷歲賜之物雖從之而所居相距常十餘里蓋懼其或相害耳慶曆二年聞元昊叛遣蕭英劉六符來請石晉所割瓦橋關十縣詔富弼張茂實往報焉歲復增銀絹二十萬皇祐元年遣使來告伐元昊明年來告捷至和初又齋其畫像來欲求御容未及往而宗

真死其子洪基立宗真廟號興宗在位凡二十五年

此段寫出荒淫景象妙有致

常與教坊使王稅輕十數人結爲兄弟出入其家或

拜其父母常夜宴與劉四端兄弟及王剛等數十人

入樂隊命后妃易衣爲女冠后父蕭磨只言漢官皆

在此后妃入戲非所宜也宗真擊碎后父首日我尚

爲之若女何人也閒常變服入酒肆寺觀如王剛姚

景熙輩常遇於微行中皆顯官宗真敬佛教僧正拜

三公三師兼政事令者二十人左右所親信多擢爲

將相契丹國境自幽州東行五百五十里至平州又

五十里至古遼城。謂之東京。北六百里至烏惹國。東南接高麗。北至女貞。東踰鴨綠江。即新羅也。原本北至下多至字無綠字

夏國趙保吉。姓拓拔。其遠祖仁福者。思恭之族也。唐

僖宗始以思恭為夏州節度使。賜國姓。思恭族亂。仁

福繼之。故亦稱李氏。仁福死。子彝超興。相繼為定難

軍節度使。彝超而上。五代史有傳。彝興死。興本與宣祖廟諱下

殷字同故改曰興。子光叡繼。光叡死。子繼筠襲。繼筠死。弟繼

捧襲位。其從父綏州刺史克文言。繼捧不當襲。請遣

使與偕。至夏州。諭令入覲。繼捧乃舉族歸朝。其弟繼

遷在銀州。太宗賜以國姓。俾隸屬籍。又賜繼捧名曰

保忠。繼遷名曰保吉。為夏州節度使。歸鎮。初保忠之

來覲也。保吉言乳母死。出葬郊外。匿兵器。葬車中。遁

入蕃族。收部曲散亡者。劫西羌種落為邊患。雖賜姓

名。而侵擾夷落不已。保忠歸。又潛與表裏。遂往依之。

保吉不納。復還夏州。牙校已據其城。保忠不得入。及

王師進討。俘保忠以歸。故保吉因并夏州之地。真宗

即位。始遣使修貢。朝廷遂以保吉為夏州節度使。未

幾。乃攻陷清遠軍及靈州。景德元年。劫西蕃。至西涼

府潘羅支詐降保吉受之羅支合六谷蕃部擊之保吉中流矢死其子阿移襲更名曰德明而遣使請命於朝廷明年奉表歸款請市青鹽不允乃閱馬謀內寇時秦翰曹瑋請進兵討擊上以其人常已歸款不許遂以向敏中知延州令撫納之敏中請召其子弟宿衛德明不從止上誓書并錄保吉遺言以聞真宗念邊兵久戍乃授德明定難軍節度使加西平王又請行青鹽不允遂出大里河築柵蒼耳平八年築堡西州濁輪谷建榷場以誘致商旅詔沿邊禁止自是

閒擾邊境攻陷甘州取西涼府天聖中德明卒子元

昊立元昊既長德明數語之曰國中三十年不披皮

毛而衣錦綺之衣汝無負天子也○練○達○之○言○吾常從事於兵雖

苦勞萬狀第自困耳及死贈太師尚書令德明娶米

母氏生元昊咩朱氏生魂成元昊以五月五日生小

名崖塊○錯○落○入○妙羗謂惜為崖謂富貴為塊性克悍多猜忌曉

浮圖法通漢文字凡案閒常致律法書自為蕃書十

二卷文類符篆建蕃學使蕃官子弟習之襲德明官

為定難軍節度使檢校太師兼侍中封西平王天聖

十年改元明道元昊避其父名止稱顯道景祐元年遂僭改元開運入寇環慶殺掠居民詔約束之米母氏族人山喜謀殺元昊事覺醜殺其母沈山喜之族於河白是攻略諸羌屢爲邊患其從父山遇知元昊有反計勸止不從山遇懼挈族來歸知延州郭勸乃執以還元昊至則殺之是歲僭帝號國稱大夏改元天授明年遣使來告詔削奪官爵除屬籍旣而爲慢書畱旌節敕告於歸孃族而去康定元年寇金明執監押李士彬而劉平石元孫陷於三川口慶曆元年

何謬誤至此徒堅黨惡之志

任福戰歿於好水川明年復戰定川寨葛懷敏死焉未至定川常遣李文貴欲納款知延州龐籍意其詐畱未遣復數月果入寇籍名責其使而釋遣之文貴去月餘復來籍視其書未去僭號卻之俾自請明年上書更名曩宵稱男不稱臣籍又拒焉詔遣卻良佐張士元等更往議之而曩宵之使繼至四年冊爲夏國主令稱臣稟正朔改所賜敕書詔而不名聽自置官屬遣使至京許就驛貨易宴坐朵殿朝廷使至其國用賓客禮歲賜銀絹綵共二十五萬五千於是始

此紀西夏人物制度風俗居食輿地戰鬪雄健錯落逐段引入勝與五代史可稱合璧矣

歲修貢。曩宵用兵多詭計。左右用事之臣有疑必誅。先世居室衣冠文字莫不改革。其文人服靴笏幘頭。武臣金帖鏤冠。衣緋衣。金塗銀黑束帶。佩蹠躐穿靴。餘皆秃髮耳重環。衣紫旋襴。六垂束帶。佩解錐刀弓矢。垂鯢皮鞍馬帶。纓議事。即率諸酋適野藉草而坐。其俗舊止。重冬至。至自曩宵僭竊。乃更以四孟朔及其生辰相慶。賀曩宵七娶。其五曰野利氏。身頰長有智謀。曩宵畏之。戴金起雲冠。使它無得冠者。生三子。獨甯令哥存。僭稱太子。又納沒曷女。營天都山居之。野

利氏之叔遇乞有言。而曩宵殺遇乞。得遇乞之妻。生諒祚。慶曆七年。甯令哥弒曩宵。不死。傷其鼻而去。匿黃蘆。為訛厖所殺。曩宵因鼻傷卒。年四十六。子諒祚襲自仁福。至繼筠。世居夏州。及保吉變詐。跋扈外侵。西羌種族。內竊靈綏銀夏。至德明。攻陷甘州。拔西涼府。其地東西二十五驛。南北十驛。自河以東北。十有二驛。而達契丹之境。至曩宵。破瓜沙肅州。遂盡得河西之地。在德明時。兵十餘萬。而已曩宵之兵。踰十五萬。自謂地廣兵勁。敢行僭叛。然而不通互市。歲賜仍

絕六七年閒亦已困弊不如是。其寇攘之患固未易息也。西北少五穀。軍興糧饋止於大麥、華豆、青麻子之類。其民則春食鼓子、蔓、鹹蓬子。夏食菘、蓉、苗、小蕪。荑、秋食席雞子、地黃、葉、登、廂、草。冬則畜沙葱、野韭、柅霜、灰、蓀子、白蒿、鹹松子。以爲歲計。其人能寒暑饑渴。長於騎射而不能槍刀。出戰用隻日。避晦日。齋糧不。過一旬。弓弩用柳幹皮弦。雨雪則不能施。兵行晝揚沙。夜舉火。以爲斥候。將出兵先卜。四一用艾灼羊夾面骨以求兆。謂之炙勃焦。二擗竹於地。若揲著以求。

數謂之擗算。三夜以羊焚香呪之。又燒穀火撒之。靜處晨屠羊。視其腸胃通通則兵無阻。心有血則敗。四以矢擊弓弦而聽其聲。知敵至之期。及兵之勝負。民居皆立屋。有官爵者始得覆之以瓦。其部族一家號一帳。男年十五以上爲丁。有二字丁者取正軍一人。負擔一人爲一抄。負擔者隨車雜使也。四丁爲兩抄。餘號空丁。願隸正軍者得射它丁爲負擔。無則許射正軍之疲弱者爲之。故壯者皆戰鬪而得軍爲多。欲西用兵則自東點集而西。欲東則自西點集而東。年

六十以下十五以上皆自備介冑弓矢以行好立虛

原、倒作五、十、

原作校。

寨多設伏兵馬軍用鉤索絞聯雖死馬上不落凡正

軍給長生馬馳各一死則償之每入寇必先犒飲山

原、倒作國中

訛者橫山羗也其主將皆陣後立馬督戰得中國人

無藝者使耕於河外或守肅州城驍勇則刺為軍蕃

族有和斷官擇氣直舌辨者為之以聽訟之曲直殺

人者納命價百二十千俗喜復仇然有凶喪者未復

負甲葉以為記不能復者集鄰族婦人烹牛羊具酒

食介而趨仇家縱火焚之其經女兵者家不昌故深

惡焉。

俗謂婦人原本常已已作有令撫令作全止上作止西涼上取字作和變詐訛作
為麻魁 變詐銀夏夏訛看十四訛作命四人訛訛所四以作又以知敵知作以

原作同也

唵嘶囉初名欺南陵溫箴逋生磨榆國蓋吐蕃贊普

之苗裔也同羗西部族未有服屬大姓聳昌厮均等

咸平中迎至河州欲立文法請更其名曰唵嘶囉河

州人謂佛為唵謂兒子為嘶囉於是宗哥僧李立遵

族原作秩

與邈川溫逋哥略嘶囉如郭州立文法部族稍歸之

因徙居宗哥城以立遵為輔大中祥符末嘶囉命立

遵率衆十八萬襲秦州生熟戶知秦州曹瑋以兵擊

之趨走西涼府又為所敗遂與立遵不協徙居邈川

更以逋哥爲輔遣使秦州求內屬詔授嘶囉魏川首領寧遠大將軍愛州團練使以逋哥爲歸化將軍後逋哥謀亂嘶囉殺之而改蒞青唐景祐中授兩使畱後久之朝廷以元昊不臣遣屯田員外郎劉渙諭嘶囉攻元昊適元昊大舉兵襲嘶囉堅壁鄯州不與戰元昊度水常植幟以誌淺淺嘶囉潛使移所植及元昊衆潰趨誌處溺死過半自是數以計敗元昊及元昊取西涼府而嘶囉得厮鐸叔之衆十餘萬回紇亦以數萬人歸焉其勢遂強於諸羌朝廷屢加以節命

爲保順河西鎮節度使洮涼兩州刺史卒年六十九嘶囉三子皆被恩命曰瞎羶居合龍谷曰磨羶角居宗哥城曰董羶爲嘶囉嗣其母喬氏獨居曆精城有才色所部六七萬人號令嚴明莫不畏服

原無嚴字

原本通生作通牛無如郭字從新編改增

交州李公蘊始爲本州大校節度使黎至忠苛虐公蘊常陰贊之故特見親信因令冒姓黎氏大中祥符三年至忠卒有子纔十歲而其弟明提昶爭立公蘊遂殺之自稱畱後遣使請命真宗曰始黎桓劫丁璿自立公蘊復爾蠻夷奚責焉遂授靜海軍節度使安

南都護交趾郡王大中祥符七年因捕狄獠寇如洪寨詔轉運司追所略生口因飭戒之天聖中又令其子弟率衆入寇詔發峒丁討捕未幾卒子德政自稱畱後來告哀天聖六年除檢校太尉靜海軍節度使安南都護交趾郡王景祐三年寇邕州之恩陵等州及諸峒略牛馬焚室廬而去詔責問令捕會領正其罪寶元初進南平王皇祐閒以兵二萬助平儂智高詔卻其兵而優賜焉久之卒子曰尊

妖寇

原本贊詔替桓詔相討訛計

蜀賊王小波李順皆青城縣人淳化三年聚衆爲亂先陷青城縣四年劫彭山縣令齊元振金帛元振率衆拒之逐元振賊勢漸盛都巡檢使張玘戰歿於江源二月攻陷成都知府郭載奔東川小波因與張玘戰傷病卒衆推其妻弟李順爲帥旣而攻彭漢州成都府順乃僭號建元應運朝廷遣內臣王繼恩同韓守英馬知節石普率師平蜀五年五月破賊擒順獻首餘黨招捕無遺蜀土富饒自乾德閒孟昶旣降府庫充溢重貨銅布由舟運下三峽輕貨設傳置以四

十兵隸爲一綱。號曰進綱。水陸兼運。十餘年。始悉歸內庫。時守臣務利入之厚。常賦外。更爲博買。務禁民私市物。帛而兼并者。釋賤販貴。小民貧失家。田業故小波以言動衆曰。吾疾貧富不均。吾與汝均之。貧民由是附之者衆。又朝廷常命張樞使蜀。樞奏劾官吏不法者百數。獨舉彭山縣令齊元振。清白疆幹。降璽書獎諭。元振素貪暴。因是益橫。受財得金帛。多寄民家。小波知民怨苦之。遂散其金帛。殺而剖其腹。實以錢刀。用快其意。是時樞知榮州賊攻州。卽以郡印及

所受告。敕降賊。受其僞命。爲榮州刺史。王繼恩以聞。太宗斬於州市。而磔其尸。

原本既而而字作得

軍賊王均。神衛指揮都虞候益州駐劄。咸平三年。神衛卒趙延順。以衆怨鈐轄符昭壽。多用親隨僕言。榜箠軍人。因馬逸喧擾中。殺昭壽及僕。均率衆擒延順。及其黨不能獲。乃同劫均爲帥。知州牛冕出漢州。均遂僭號。建元化順。自正月叛。奏至。以雷有終知益州。命內臣秦翰同團練使石普。上官正率兵征討。九月。均敗竄石普。秦翰。楊懷忠。追斬於富順監。梟首州市。

軍賊陳進宜州澄海軍校景德四年因衆怨知宜州劉永規苛役殺永規及監押國鈞據城叛劫判官盧成均爲帥詔東上閣門使曹利用安撫廣南路率兵進討九月遇賊於象州仙縣擊敗之襲至象州斬陳進及其黨而盧成均挈家屬以降時象州城守四十五日矣擢知州大理寺丞何邴祠部員外郎三子皆賜出身以守城功也

原本缺下無之字

區希範環州人常舉進士試禮部景祐五年應募討安化州蠻詣登聞鼓院進狀求錄用下宜州勘會知

州馮伸已言其妄邀功賞遂送全州編管旣而遁歸與其族百餘人謀舉兵殺伸已以叛乃殺牛建壇場祭天神推白崖山酋蒙趕爲帝叔區正辭爲奉天開基建國桂王而自爲神武定國令公桂牧皆北嚮再拜以爲天命又以區丕績爲宰相區志珪爲都統使崔盈爲節度使區世庸爲飛天神聖將軍蒙懷爲百勝將軍譚護爲突陣將軍甘徹爲龍路將軍吳程爲蜂毒將軍廖陳爲遊奕將軍蒙樛爲雷行將軍共僞補三十餘人聚衆二千餘人慶曆四年攻陷環州得

其印遂以環州爲武成軍，繼破帶溪普義寨，下鎮寧州等處。宜州捉賊李德，用出韓婆嶺，擊破之，獲其僞將崔盈、譚護二人。希範遂入保荔波洞，閒出拒官軍。明年，詔西京轉運使杜杞加直集賢院，爲廣西轉運使，兼安撫事。杞至宜州，得州人吳香，獄囚區世宏及攝官區擘，進士曹子華，往說諭之。又率兵破白崖黃泥九居山等寨，及其五峒，斬首千餘級，復環州，焚其積聚。蒙趕等大恐，率其徒隨香出降。杞犒以牛酒，六百餘人始與盟。置曼陀羅花酒中，既昏醉，悉殺之。後

杜杞殺降失心非柔遠之道

三日得希範及區丕績等十數人，割希範腹，績其五藏爲圖，而醢以賜諸溪峒，餘悉就戮。

軍賊王則，涿州人，因歲儉，流移至貝州，應募宣教軍爲小將。初去其鄉，母與之訣，刺福字背上，以爲記。冀貝閒多妖術，則習之，欲爲亂，遂結衆言背自然隱起。一福字衆惑而敬事之。州吏張鸞卜吉者爲之主謀。慶曆七年冬至，郡官赴朝拜，遂率其徒劫庫兵以叛。執知州張得一囚於獄，囚悉縱去。通判董元亨不與軍帑鑰，首被殺。司理叅軍王獎爲獄囚所害，監兵田

斌鬪不勝而出提點刑獄田京任黃裳持印棄家屬
絕城而去獨得一俛首事之獲存餘悉死焉則僭稱
東平郡王張鸞為宰相卜吉為樞密使建元德勝旗
幟皆為佛字則遣人要虜使而安撫使賈昌朝諜知
命殿侍安素伏兵西門夜俟其徒出盡得其首級詔
遣叅知政事文彥博知開封府明鎬為河北宣撫使
副以平其亂官軍即城南為地道因日攻其北以牽
制之地道成而兵入則始開東門遁為總管王信所
獲檻送闕下封戮都市自反及敗凡六十六日餘衆

捕殺無遺其妖書有滴淚經五龍經

原本亦訛十徒訛徒到訛封
新編釋祥變德勝作得聖

廣源州蠻寇儂智高蠻商之子其母阿儂左江武勒
之族轉至交趾適儻猶州知州儂全福子全福為交
趾所擄阿儂改適蠻商生智高智高長遂殺其父阿
儂又為特磨道儂夏卿之妻皇祐四年智高聚衆入
寇初陷邕州遂僭號稱其母阿儂為皇太后阿儂克
悍有謀嗜小兒肉閒以具庖食智高用其計遂自邕
攻橫貴龔潯封藤梧端康州所至驅劫軍民衆至數
萬乃進圍廣州朝廷先命楊旼曹修為廣南安撫使

經制蠻事。又繼以孫沔、余靖任安撫使。久未奏功。遂除樞密副使狄青爲宣徽南院使、宣撫湖北路。經制廣南賊盜事。青至，合孫沔、余靖三將兵，大破其衆於歸仁鋪。智高夜焚邕州城，奔大理國。其母阿儂潛歸特磨道，依其夫儂夏卿，收殘衆得三千餘人。復將入寇石鑑。世居邕州，諜知其動息，遣峒丁入特磨道掩襲擒阿儂。及智高二子繼宗、繼封、弟智光，竝檻送闕下。阿儂年六十，朝廷始欲存之，以俟智高之降。及智高已爲大理國所殺，故悉封戮都市。

原本其計其作不脫澆字封說封

卷畢

讀隆平集叙後

凡譔述之大者一在羽翼聖經一在纂修當代然言以明道經前儒之所已言後之人雖百思焉而無以過則翼經難若夫遠覽旁搜取朝廷大制作大典章下至民間風俗隱僻怪詭之事一一垂諸紀載則史官之職也亦一時之事也似有才者卽能爲之不知憑臆見爲編摩任私心爲去取非愚則誣皆無與于古今得失之林者也故史才自班馬而下寥寥不數人是必學術醇而人品正天資高而筆力古乃有以

勝其任而愉快予族祖文定公文章名天下既醇乎
經學而隆平集則其史才也此種著作與公之文又
不同文或鴻裁大篇此則零雜記注文或憑空立論
此則逐事詳明至今讀之其短篇則如左氏傳其長
調則如賈太傅其典核又如秦風小戎所狀士馬器
甲板屋土風宛然在人看宇間真曠代逸才也哉惜
兵燹後舊刻朦混卽存者亦無幾蓋學士大夫非好
學深思誰復讀此卽讀矣心知其意矣亦未必捐貲
刊刻公之後學黃魯直云安得奇士盡刻杜甫兩川
詩集使大雅之音振三巴之耳蓋言表章之難也今
毅齋先生潛心古學旣編定其文集復取茲集而校
讐焉正其句讀辨其訛舛俾公之經學史學並傳而
其所以資經濟之業者信乎其未有窮也予因之有
所感矣宋代文章首推廬陵公固其所取制科士二
公皆有文集有史集譬若延津之劍並化爲龍神物
終當合也

康熙四十七年歲次戊寅十月

南豐後學曾鴻麟謹跋

聖照四才少半錄定九月十日

條當合也

公嘗有文集亦史集贊其要事之概並分爲諸類
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之
其類以資孫有之類亦計平其未存錄也予因之



書